

摘藻堂四庫全書薈要

集部

欽定四庫全書薈要

集部
明詩綜卷八

詳校官編修臣王天祿



欽定四庫全書薈要卷二萬四百八十一

集部

明詩綜卷八

翰林院檢討朱彝尊編

徐一夔

二首

一夔字大章天台人徙嘉興元末建寧教授洪

武初召修禮書終杭州府學教授有始豐類藁

靜志居詩話實錄洪武二年八月詔儒臣纂修
禮書徵儒士徐一夔梁寅劉于周子諒胡行簡
劉宗弼董彛蔡深滕公瑛至京時曾魯以元史
方成奏留之同纂修三年九月書成賜名大明



集禮通五十卷授曾魯徐一夔周子諒董異以
官梁寅等六人以疾賜還鄉里宋景濂撰楊廉
夫墓志云國朝天下大定詔遺逸之士纂禮樂
書君被命至京師僅百日而肺疾作乃還卒年
七十五洪武庚戌夏五月也而梁孟敬贈徐大
章序則云吳元年丁未歲以詔徵至都大章亦
見徵是時置三局一律局二禮局三誥局余備
員禮局而大章撰誥文同居官寺者半歲云云
若是則禮局律局同時分設而大章孟敬俱於
吳元年即被徵矣實錄又載吳元年八月徵江
西儒士劉子等至京欲官之俱以老病辭各賜
帛遣還則劉子亦以吳元年即被徵矣且劉宗
弼者承直之字承直於吳元年十月官國子司
業不應於洪武二年又同遺逸之士並徵也又
中書省定律令亦係吳元年十月事至十二月
律令成命頒行之則律局可輟不煩二年猶與

禮局並存也此皆事之大可疑者相傳廉夫賦
老客婦詞進御其辭云老客婦行年七十又一
九按是歲己酉廉夫年七十有四爾何必增益
其齒以誑孝陵邪殆好事者為之又考當日同
修禮書尚有魯淵道原實錄削而不書者以道
原書未成時先卒也梁孟敬有輓詩載石門集
大章遺藁罕傳余於京師見之今刑部尚書新
城王先生貽上所見四冊比余家藏者倍之然
驗其日無詩猶未是足本也

至正己亥兵後明年八月之望同守繆公招同諸
彥集南湖即席分韻得久字

青丘緩殫黑飈撼九有海走翻蛟宮山移若螳臯雖

愛赤城霞歆瀑當窗牖棄擲不敢顧欲卧豈得久里處
擇其仁於焉得林藪衍原饒杭秫詩書足朋友何期復
中兵難作在丁酉東西競奔竄顧尾不救首幸云全此
軀長疑是夢否還見湖上月兼之對名酒狂奴故態萌

噓然開笑口

郁伯承云僧雪廬資聖寺記至正十八年八月嘉興兵變而大章詩云難作在丁酉

是丁戊己三年郡皆被兵也故高士
執詩亦云前年奔山登去年匿檣舵

辛丑秋七月曹廣文招同諸子憩西郭景德寺分

韻得半字

野曠天逾豁川平路疑斷不知何朝寺突兀古河岸潭
蘊白氣沒林密翠霏亂勝地固清涼火流七月半合并
洵難得通塞奚足算廣文厭官舍亦此事蕭散風櫺爵
屢行蘿磴席頻換但覺清敞發寧顧白日旰吾欲紀茲
游埽塵勞弱翰

梁

寅

二十四首

寅字孟敬新喻人元末辟集慶路儒學訓導洪
武初徵修禮書書成以老疾辭歸有石門集

詩話孟敬入禮局雖不為好爵所縻然石門集中賦南歸則云煌煌乎大明之盛典兮搜巖穴而旁徵承賜金之渥恩兮荷錫服之殊榮寄子岷詩云赫赫皇明文治肇興惟俊良是詢惟隱淪是徵嗟余罷老亦承詔以行東武吟云隋珠耀明月和璧誇縣蔡及時不自獻明君焉得知寓館咏懷云聖君優老無窮感京城元夕云萬里昇平感聖朝洪武元年正月四日恭覲龍飛歡忭而作詩云赫赫大明逢盛代載歌周雅贊皇文感恩頌德之辭不一而足方之抱遺翁似有間矣故序於通籍者之列

歸醴溪

久厭都市喧俛思山巖靜歸飲醴溪泉怡我淳樸性神

峰雜樹擁石門翠屋並蘿懸晨露滋巘秀夕霞映寒裾
蔭雲松脫屣悅風磴悠然邀客心疊出野人詠方期谷
口耕毋諠終南逕

和楊逸人桃林遷居之作

心寂忘塵囂時清樂巖築愛此桃華林葺之杜衡屋葛
籬延芳藟石梁照淺渌風翔雙白鳥雨卧一黃犢東臯
雜婦子中野見樵牧賦詩雲霞鳴攜壺錦繡谷從君以
優游於焉謝羈束

題西山程氏南窗

獨居南窗靜秋木連翠岑鳴琴衆葉下把酒孤援吟寧
負朱紱願莫垂白雲心羨彼歸田叟高風留至今

為臨川章則常題山水圖

山擁衡廬青水含瀟湘碧兩厓蟠蛟樹千歲蹲虎石遙
遙溯川舟泛泛騎驢客憑高者何人間看楚雲白

題印土寺罷釣軒

曲池照林鴈百尺懸蘿陰開軒坐垂釣水清如我心小

魚易傷生大魚或涸沈投竿為之惻於此悔悟深名區
縻好爵都市爭黃金但戀鉤餌馨豈知憂患侵濯足南
澗流振衣北山岑既羞結網罟何必漑釜鬻物生免相
賊嗜欲常自禁嘉此古人意託之金石音

擬古 六首

獨處衡門下慨然思九州我馬苦疲怯山川多阻修豐
草被長坂麋鹿或羣遊蔚彼嘉樹陰鳴禽自相求彼物
各有適而我何寡儔日月雙車輪恒恐不少留願與二

三友朝夕論王猷母為自局促窮廬悲白頭

芙蓉在江浦亭亭豔清波雖云出淤泥麗質良可嘉
裳涉枉渚凌風折芳花願言贈君子翫之比瑤華於時
苟不惜顛顛當奈何

江海處卑下百川皆赴之山木鬱蕭森上竦無繁枝
王侯稱孤寡惟恐嬰菑危謙虛受衆益天道盈必虧
周公下白屋吐哺情孜孜孫子相南楚祿豐心愈卑
奈何閭閻子往往多矜持

昔嘗好名山五嶽期遍歷思見松與喬再拜問仙液微
生累妻孥常為飢凍役歎此血肉軀何以生羽翼諒非
金石同服食竟何益不如安我常百年順所適

雲門輟清響鄭衛音方揚錦衣受垢污不如練布良軒
軒青雲士鳴玉升廟堂名高受讒毀寵盛罹愆殃美女
惡女仇偏聽姦以萌衆口能鑠金況乃忘周防所以君
子心惟用德自將行行九折坂戒哉銜檠傷

我有太古琴千年妙音續七絃何泠泠聽之非促邈一

彈文王操再彈宣父曲聖人宛見之何由躡其躅大道
日以淪澆詭馳衆欲孰思障顏波九州反淳俗夔龍為
股肱巢許遜巖谷窮通各有志於我奚不足

歸息二首

歸息蒙嶺陽聊比嵩少岑樂此林藪趣遂忘江海心沿
澗蹇芳藟入谷聽幽禽流泉響松下潺湲非俗音猗蘭
被徑畹香氣襲衣襟顏景忽西匿浮雲夕以陰睠彼羣
飛鳥翩翩投北林

春陽既和煦時雨亦霑濡原野綠已遍土潤含膏腴兵
戈幸少戢良農日墾鉏戴勝鳴桑林鷓鴣亦交呼嗟我
理編簡四體忘勤劬羔裘媿逍遙梁鵲恥安居素餐古
所誚偶耕良我徒

簡伯英伯筠見訪雨留信宿

谿谷雲晝合東林微雨來二友歛俱至一見紆中懷埽
我茅茨室為君緇帙開上言風雅醇下言豔歌諧何以
相淹留清醕不盈杯何以為遠贈愧無瓊與瑰煦風失

金
堅冰谿水流涪涪歸鴻正翱翔浮鷺散參差告我遽言
旋定省恒懼垂懿此孝友心令德善自培願為王國士
無愧北山萊

題番陽蔡淵仲默齋

獨坐衆囂寂靈淵虛以澄樸拙固吾性佻巧非吾能言
辭戒放逸脣頰思緘滕吉與躁殊趣仁以訥見稱呐呐
譽何損呶呶時所憎恐玷懷白圭來讒忌青蠅無妄天
之佑主靜道斯凝曾閔庶可慕予賜在所懲萬言不如

默誠哉宜服膺

林下

客尋林下居逕幽不待掃疎篁延柔蔓殘果落深草禽
言人莫知虎跡僮驚報何事嬰余懷甕牖悟天道

簣谷作

老樹山橋晝瀟灑興來濯足蒼藤下雲邊厓石危欲落
雨後泉流急如瀉客過松林貪翠陰農分稻苗散青把
桃源風土良可樂何恨龍鍾在田野

對雨

飛雨山棚爽繁雲竹巷迷翠藤低拂石黃葉澹霑泥樹
杪盤飢鶻牆根泣露雞園夫桔槔廢流水滿青畦

贈西山僧

高僧自喜巖下住長見白雲飛復迴半山風吹松子落
千歲石作蓮花開鳥下林堂待分食龍遊溪水遇浮杯
吳山楚山聊暫住還把楞伽歸去來

天寧寺和曾得之兼呈彭聲之及雪印

經年不到天寧寺却喜春濃叩竹扃
二水共明洲外碧千峰如削雨餘青
謾勞山茗時時煮自笑齋鐘日日聽
垂白飽聞高世論巖棲空愧老窮經

初夏

樹暗雲更深鳥啼春已去多謝桃源人
能留漁父住

為王仲義題雪梅

小橋東郭先生履曲逕西湖處士家
向暖早看花似雪冒寒更愛雪如花

金史四庫全書
卷八
和何彥正春耕 二首

見說春耕溪水頭賦詩猶憶玉京遊
莫誇塞北千蹄馬
寧買江南十角牛

竹間樵逕行應熟花外漁舟望欲迷
處處稻畦分落照
荷鋤人去水禽啼

劉承直 一首

承直字宗弼以字行贛州人元進士
明初與修
禮書官國子博士升司業出為浙江按察司僉

事

王子充云劉君工選體出入鮑謝之間

秋日東林宴坐

高秋坐虛館
颯然神慮清
迴飈疎雨瀟瀟集
前楹始欣塵壒遠
稍覺微涼生
簷鐸遞相答
林蟬時一鳴
物情各有適
吾生豈無營

周子諒

二首

子諒名愷以字行廬陵人與修禮書授工部虞

衡司主事

劉仲修云子諒之文豐而不汎乎辭約而能達其意其詩清新婉麗春容

幽
遠

讀子書作

學館坐無事故書聊復翫披文既薈最尋義亦泮渙趨
前後已逸顧舊新輒竄萬言雖畢陳一理竟未貫往往
卷末終心目已潰亂易書詩春秋辭簡義亦煥奈何百
家書累累疊几案縣延比葛藟根遠益纏絆雕剝出葩
卉綴緝呈組纂推以合身心宜若霄壤判吾欲盡其文
掇取歸爐炭往者予弗及來者予何憚作詩示朋曹無

乃駭童中

贈別郭元達

黃鵠乘天風飄飄忽高翔飛飛巢林鳥刷羽情內傷豈
無凌霄志六翮不得長念子平生意相送以傍徨勿言
易為別明發各一方悲來解佩劍為子復進觴且為游
子歌歌詞何慨慷疾風吹征颿旭日在衣裳自古有離
別各言慎行藏

林弼 三首

弼字元凱初名唐臣龍谿人仕元為漳州路知
事戊申內附以儒士登春官修禮樂書除禮部
主事歷登州知府有梅雪齋橐

龍州

三首

峒丁峒婦皆高髻白紵裁衫青布裙客至柴門共深揖
一時男女竟誰分

近水刺桐知驛舍倚山毛竹即人家趁墟野婦沽甜酒
候客溪童進辣茶

白沙青石小溪清魚入疎罾艇子輕漫說南荒風景異
此時真似剡中行

張

翊

二首

翊

或作翼

字翔南建德人徙居嘉興元至正乙巳

舉于鄉薦主甬東書院山長不就吳元年徵入

禮局告歸有梓宇集

沈客子云翔南歸自禮局郡庠延訓諸生家近宣公

祠庭有巨梓集以是名

詩話洪武修禮書吾鄉與者三人徐一夔大章陳世昌彥博及翊也翊所居有巨梓一變為作

記楊庶夫亦有題咏故翼是作楊哀辭有云志梓
寓榮哀衰兮又新昌乎聲詩梓宇集不傳朱翰
輯楊李英華
取其詩壓卷

賦得韭溪春水送張別駕

春風吹花澄海門
韭溪雨足浮春雲
碧漪分流入城去
石闌倒壓玻璃紋
使君青驄駐溪側
撾鼓官船送行色
片帆直泝五湖風
水晶宮中夜吹笛

西湖竹枝詞

南高北高峰頂齊
錢唐江水隔湖西
不得潮頭到湖口

郎船今夜泊西溪

詩話辛丑夏留湖上昭慶僧舍時錢湘雲曹澤躬周元亮施尚白諸先生先後來游杭人有持元西湖竹枝請錢先生甲乙者先生謂曰和者雖多要不若老鐵次日羣公泛舟於湖曹先生引杯曰鐵厓原倡之外誰為擅場各舉一詩不當者罰周先生舉陸仁良貴作云山下有湖湖有灣山上有山郎未還記得解儂金絡索繫郎腰下玉連環施先生舉張簡仲簡作云鴛鴦胡蝶盡雙飛楊柳青青郎未歸第六橋邊寒食雨催郎白紵作春衣南昌王猷定于一舉嚴恭景安作云湖中女兒不解愁三五蕩槳百花洲貪看花間雙蛺蝶不知飛上玉搔頭吳素于令令昭舉強珣彥栗作云湖上女兒學琵琶滿頭都插開妝花自從彈得陽關曲只在湖船不在家

武進鄒祇謨詩士舉申屠衡仲權作云白紵衫
兒雙髻了望湖樓子是儂家紅船撐入柳陰去
買得雙頭茉莉花錢唐胡介彥遠舉徐夢吉德
符作云雷峰巷口晚涼天相喚相呼出采蓮莫
為采蓮忘却藕月明風定好迴船蕭山張杉南
士舉繆侃叔正作云初三月子似彎弓照見花
開月月紅月裏蟾蜍花上蝶憐渠不到斷橋東
山陰祁班孫奕喜舉釋文信道元作云湖西日
脚欲沒山湖東月出牙梳彎南北兩峰船上看
恰似阿儂雙髻鬟錢唐諸九鼎駿男舉馬琬文
壁作云湖頭女兒二十多春山雨點明秋波自
從湖上送郎去至今不唱江南歌予曰諸公所
舉皆當然未若吳興沈性自誠之作也其詞云
儂住西湖日日愁郎船只在東江頭憑誰移得
湖山去湖水江波一處流不獨寄託悠遠且合
竹枝縹緲之音曹先生曰然於是諸公皆飲予

亦浮一大白。因思舊事四十年矣。錄翔南詩其
旨與沈作畧同。又吳世顯彥章詞云。湖中日日
坐船窗。水面鯉魚長一雙。好寄尺書問郎信。慙
人湖水不通江。意亦相合。然俱未及沈之俊逸
也。

劉

儼 一首

儼字敬思。錢唐人。元末隱居西湖。明初徵入修
禮樂書。授廣東市舶司令。有樗隱集。

詩話敬思為管長史訥之師。其卒也。哭管以詩
云。痛哭劉夫子。如今隔九泉。家聲俱溢耳。才望
孰齊肩。百氏遭漁獵。羣經費討研。薦章何懇懇。
束帛竟戔戔。東壁星辰表。西清雨露班。陪黃

閣老名廟玉堂仙禮樂皆新製方與有續編宣
麻應內命行李急南遷漢節衝蠻雨黎歌入瘴
煙客庖魚米賤商舶象犀聯省檄官將調郵書
計遽傳哲人其逝矣小子獨淒然踵接才雖劣
心喪禮自專不知雙眼淚何
日罷潺湲丁鶴年極稱之

舟中漫興

青天縹緲吹雲衣碧水顛倒插翠微三家五家村舍出
一點兩點沙鷗飛柳絲裊裊拂過艇苔花斑斑生釣磯
風塵不到是樂土莫怪往來城府稀

魯

淵

四首

淵字道原淳安人至正辛卯進士江浙儒學提
舉洪武初徵修禮樂書詔授江西按察司僉事
以病辭有魯道原詩集

詩話道原為沈原昭之師嘗與楊廉夫張光弼
校文貢院其題入貢圖詩云九州文軌車書混
萬里梯航玉帛齊感懷詩云越裳翡翠供輸少
遼海雲航漕運通蓋猶及見元盛時者其後幾
死於寇極其顛沛晚宿新岑詩云杜鵑山外
家千里姑惡聲中淚兩行誦之亦可悲矣

題馬文璧秋山圖為盧仲章賦

野館空山裏林泉象外幽淡雲初霽雨紅葉早驚秋路

轉山藏屋橋危岸倚舟直疑人境異便欲問丹丘

越中避難適周橋

喪亂今如此漂零豈偶然有身長作客無地可歸田
兵火淒涼夜風塵黯澹天故人知愛客同權鑑湖船

長安市

夜泊長安市鄉鄰崇德州驛亭無駐馬堰水有行舟
壞道薶荊棘陰房聚髑髏淒涼兵火地人物總荒丘

重九

白雁南飛天欲霜蕭蕭風雨又重陽已知建德非吾土
還憶并州是故鄉蓬鬢轉添今日白菊花猶似去年黃
登高莫上龍山路極目中原草木荒

劉永之

二十一首

永之字仲修清江人明初徵士有山陰集

梁孟敬云

仲修遺詞發詠追金琢璧鉅篇短章矩度忠合
敦子發云山陰翁詩諸體皆工而七言絕句
尤佳不徒深入簡齊門戶亦可與晚唐諸賢白
戰於變風境上而莫之雌雄者簡一溪云先

生詩詞格調精工諸體
備至泚泚乎風雅之遺

欽定四庫全書

卷八

詩話仲修應聘入都以其疾辭其秣陵述懷詩云誤蒙曲臺召束筆從諸公則亦微入禮局之一人矣宋景濂以辭章翰墨雙絕稱之贈詩云多少薦紳求識面江南文價為君低觀集中與梁孟敬論春秋書謂胡氏之春秋非經之本旨自為一書可爾使聖人者若後世之法吏深文而巧詆蔑乎寬厚之意此其失非細故也其識出環谷東山諸君之上其詩務去陳言取材新穎五言如青年杜書記白髮漢郎官澗水穿林去山雲帶雨回而微蒼溜緩風急雁聲稀野燒無風起邊烽共月升春明三壽草雪映九英梅蟹舍能留客漁舟不畏風鹿盧花下轉萬莖雨中鉏白鶴窺殘奕青童掃落花路危楓葉斷石陰桂根懸虎柵成山壘漁梁阻澗泉七言如過橋柳暗烏爭樹當戶花開燕入簷近瀑飛雲經樹濕穿花流水過橋香朱絃鏤管書苔紙銀簾

秋食夢橋湖古硯自磨銅雀瓦生蠟還帶局巖
踰石泉落處寒兼雨楓葉飄來冷帶霜杜若烟
生螺子港桃花水暖象牙津千峰靜對芙蓉巖
三峽遙連蟬蛩橋竹嶼暝煙浮翠黛石田秋雨
潤銀沙沙田紫蔗家家熟野徑丹峰處處飛井
底龍飛山客見峰頭鹿過野人知白雲當戶心
同靜亂竹侵階手自刪何
其似姚少監鄭都官也

秋懷

涼颼振庭樹浮雲結重陰中情忽不樂拂几彈鳴琴冷
冷多苦調零淚霑衣衿遠懷東都士登彼北邙岑悵然
望京洛五噫發哀吟悠悠千載下誰識古人心

登煙雲臺同西峰諸友分韻得跨字

振策履崔嵬飛步凌雲榭俯觀飛鳥翔遠見平江瀉彈
棋古桂陰酌酒長松下谷響嘯哀猿林香過山麝祈靈
醉巫覡尋真望仙駕翠蚪金節導青鸞羽衣跨

訪驛馬精舍能上人不遇識其從孫蕭生進修夜
坐誦詩次日書此識別留東能公

晨起忽不樂驅騎高原行四山多嵐氣日照孤峰明亭
午際江渡煙艇浮沙汀登岬迷所適岐路方縱橫忽憶

驛馬寺久慕能公名詢塗向煙霧阡陌互紆縈漸入石
路窄松蘿藹冥冥龍象雖寂寞廊廡猶崢嶸道人赴齋
出鐘梵杳無聲歎戶識之子開室出相迎宴坐畢餘景
空花聞夕磬山尊瀉芳醕秋蔬摘霜莖性昧空寂旨心
樂儒雅清夜止西窗宿風條中夕鳴病客既多感聞此
心骨驚明當舍之去沿流到江城方從湖海游暫遠林
壑情山門蔭寒沼中涵苔蘚青法源庶無竭歸日濯塵

纓

過安慶精舍

淮壖古重鎮龍舒實雄冠
顯顯青陽公銜命茲屏翰
文能宣皇風武能折兇悍
仁能撫士卒知能輯流散
孤城抗千里一身當敵萬
運否絀壯圖時屯負英算
城亡遂捐軀仗節死國難
忠義凜霜日聲名炳星漢
我來當夏杪延覽遂興歎
俯仰成古今興亡猶在眼
疲人稍歸郭買舍臨江岸
午風舟舫集夜霽燈火亂
精靈或來往廟食儼容觀
生為烈士尊死為姦臣憚
嗤嗤吟詩臺千載

污青簡

同傳商翁何彥正舟中有懷辛好禮韻

沙際水痕交細草蒙茸長春江下連雁夜雨同孤舫佳
期違宿諾歡笑懷前賞餘燼落寒燈卧聞漁板響

劉宗海為余作清江春雨碧嶂秋嵐二圖賦此贈
之

劉君早年善山水得意往往圖樵漁西昌城西一相見
忽然贈我雙畫圖圖中似是清江曲春雨蒼茫汀樹綠

煙中髣髴辨飛帆
水際依稀見茅屋
漁郎繫船江石上
一夜磯頭水新長
孤村日暮煙火微
渡口歸人暝猶往
碧嶂層巒翠轉奇
嵐光秀色含朝暉
風林落葉灑青壁
雲壑流泉生翠微
我昔結廬此山裏
每愛秋嵐淨如洗
經年奔走厭風塵
偶看新圖心獨喜
憑君添我小綸巾
明當歸掃山中雲
他日君來一相訪
松根為子開柴門

題金華余仲揚山水

人言吳中山水好
坐思絕境那能到
金華山人懷故山

時拂冰紈寫幽島贈君此圖更絕竒妙墨精思奪天造
陂陀重阜隱喬木掩仰遙汀帶文藻石嶠雲生暮色微
海門潮落秋風早賀監居臨鑑湖曲子猷宅近山陰道
江清落日櫂船回照水新袍影顛倒高情千古慕前哲
世俗紛華豈堪保經年烽火遍江南萬壑千峰迹如掃
畸人奔走厭塵濁試觀圖畫開懷抱思傍幽林結茅屋
柴門低映寒藤老放鶴前山戴笠歸獨抱長鏡拾瑤草

題古木幽篁圖

近者天下寫竹枝息齋子昂最奇特金釵折股錐畫沙
直以高情寄豪墨後來小李用家法更覺縱橫脫羈勒
御榻屏風或詔寫流落人間豈多得我家真蹟兼數公
錦囊玉軸複壁中舊宅荒涼經戰伐故物都隨煙燼空
此圖尋丈小李作位置頗殊標格同半身古樹色蒼潤
篋管因依相澹濃長林無人秋氣入蜿蜒蛇蛟起幽蟄
蠅蛸垂絲晝陰靜老鶴刷翎昏雨集黃陵廟前湘水深
捐袂江臯思俯拾浮槎尋源遡空闊析旌低度玄雲濕

何郎兄弟最好奇愛此不減珊瑚枝幽居正在蘭峰下
亦有喬木當窗扉共展長圖幽興發六月涼颼生葛衣
還君珍襲增歎息他日重看覓舊題

陳君心吾以黃鼠筆見貽此筆惟京師多用之江
南罕得也賦此贈之

冰鼠金毫銳霜筠翠管長攜來南郡遠制出北州良內
史來禽帖黃門急就章秋林多柿葉揮灑興難忘

送吳德基赴興化令

鍾定四庫全書
卷八
春江望不極芳草綠江潯千里長沙道孤帆去客心縣
城依水國吏語帶蠻音到日應無事華亭自鼓琴

經湖口縣

古縣開湖口高檣集岸隈山從廬阜起江向武昌來近
水皆楊柳荒城半草萊客心元自速更遣曉風催

為高安何思恭題方壺所畫山水

古象山中白晝閒紫煙樓觀鳳笙寒試分玉井三秋露
戲寫方壺九疊山老樹模糊常帶雨茅茨瀟灑鎮臨湍

知君隱處渾如此持向荷峰錦水看

題畫鷹

猶記鳴鞘出霸陵新豐市北醉呼鷹於今豪氣都消盡
間看新圖剔雁燈

題扇

烏絲細寫蠶頭篆白紵新裁燕尾衫雨過西軒苔色淨
澗中雲影似江帆

題竹

洞裏仙人白兔公手持玉笛向秋風
彩雲低度天如水
吹作龍吟三月中

題扇

金鳳洲頭倒玉壺
銅塘浦口送飛舻
他時若記分攜處
花滿春城聞鷓鴣

寄西峰道士

二首

百尺飛樓接太清
萬年枝上月華明
鹿車入谷無人見
應是仙人衛叔卿

石室虛明隔紫煙
靈文中閤白瑤鐫丹書隱字誰能識
歲月應題建武年

北澗夏日

酒傾蘭勺石泉香
衣翦荷盤露氣涼
誰料十年江海興
閉門疎雨對橫塘

夜宴定侯宅醉中口號

刻羽堂中畫燭明
將軍夜醉水西營
青樓小婦新承寵
彈得涼州第一聲

為彭子弘漁釣圖

彭郎磯畔小茅堂露滿秋林木葉黃石渚水生魚欲上
一江風雨夜鳴榔

孫作

四首

作字大雅以字行一字次知江陰人洪武癸丑
召修日厯書成除翰林編修以老病乞外授太
平府儒學教授入為國子助教遷司業有滄螺

集

李武曾云胥元季之人咸懷抱遺老人詩
派東家子獨以蘇黃為師洵特立之士也

詩話編纂日歷洪武六年九月事也先是徐大章報王子充書曰近世論史者莫切於日歷日歷者史之根柢也其法以事繫日以日繫月以月繫時以時繫年猶有春秋之遺記事之法無踰此也宋重史事日歷之修必諸司關白如詔詰政令則三省必錄兵機邊事則樞庭必報百官之拜罷刑賞之與奪臺諫之論列給舍之繳駁經筵之論答臣僚之轉對侍從之直前故事中外之囊封匭奏下至錢穀甲兵獄訟造作凡有闕政體者必隨日以錄歲終監修宰相點檢修撰官日所錄事有失職者罰之其慎重若此日歷不失則後日會要之修取於此他年實錄之修取於此百年之後紀志列傳取於此此宋氏之史所以可據也元則制度文為務從簡便不置日歷不置起居注獨中書置時政科以一文學掾掌之以事赴史館及一帝崩則國史院

據所付以修實錄若順帝三十六年事既無實錄又無參稽之書惟憑采訪以足成之竊恐其事未必盡其言未必馴其首尾未必貫也其論實自大章發之修日厯者七人孫大雅與焉大雅自號東家子以文見知於牛士良宋景濂為作東家子傳謂他人之文束於理則辭不暢肆於辭則理不直惟公洞矚千古之上折之則理勝闢之則辭嚴動有據依皆非臆說其推許至矣詩絕去元季之習好盤硬語有云蘇子落筆崩海江豫州吐句敵山岳湯湯濤濤絕厓岸崕崕木石森劒槩二子低昂久不下數澤遂包龜與鯉至今雜運呼從賓誰敢崛強二子角吾尤愛豫章撫卷氣先愕磨牙咋舌熊豹面以手捫膺就束縛士如此老固可佳不信後來無鯉作蓋欲力追涪翁宜詩之不肯猶人也

大堤曲

君騎白馬來我騎青驄去背面不相識兩馬驕嘶住

客中秋夜

故園應露白涼夜又秋分月皎空山靜天清一雁聞感
時愁獨在排悶酒初醺豆子南山熟何年得自耘

石菖蒲

曉露飛初濕春苗翦又生靜憐千葉瘦幽喜一峰橫鬱
鬱明人眼青青異物情安期如可待吾亦掃黃精

送杜孝廉往句容

江東勝地壓西浙，句曲山傳天下稀。
林間風生一虎過，石上月明雙鶴歸。
我擬華陽裁白帟，君如萊子奉斑衣。
日長縣幕娛親地，小轎疎櫺入翠微。

錢

宰

二十四首

宰字子予，一字伯均，會稽人。元進士，明初以明經徵，修禮樂書，授國子助教，乞歸，名較書翰林。

加博士致仕，有臨安集。

徐子元云：博士詩如霜曉，鯨音自然洪亮。黃

才伯云博士病近代新聲太繁刻意古詞
擬漢魏而下諸作補其未馴者詞林稱之
詩話博士吳越武肅王十四世孫孝陵命撰帝
王廟志章稱古每進見輒賜坐侍食嘗賦早朝
絕句云四鼓驚驚起著衣午門朝見尚嫌遲何
時得送田園樂壯到人間飯熟時明日又早臨
畢帝諭曰昨日好詩朕嘗嫌汝何不改作愛
字今日朕今放汝去好放心熟睡矣乃遣還二
十七年詔徵同揭執等二十六人定正尚書蔡
氏傳命開局翰林院賜綺繒衣被入朝班侍衛
之者賜飲酒樓還里年九十六乃卒二十四人
者黃觀景清在其中實錄持剛去蓋永樂中以
名在奸黨故也博士詩波瀾老成
諸體悉稱韓宜可唐愚士皆師之

擬古

七言

出門萬里別行行遠防邊相望各天末北斗日夜蹏四
運秋復春不見君子還燕車北其轍越馬南其轅目遠
心愈近悵然徒懸懸黃雲暗關塞路險不見天式微夫
如何日月忽已遷願言崇明德無為終棄捐

高臺何巍巍參差與雲平玉繩臨雙闕長河流無聲上
有羽衣人逍遙吹玉笙清響涵明月飛珮何泠泠借問
弄者誰疑是董雙成曲終再三歎感慨有餘情所悲同
門友局促趨世榮願將秋水劍為之解塵纓笑呼雙黃

鵲與子俱遠征

涉海采琅玕紅者珊瑚枝明珠盈懷袖將以遺所思海
闊不得返所寶莫致之爛其納我室抱璞將何為

青青梧桐樹託根在高岡與子新合歡翕如鳳與皇鳳
皇鳴鏘鏘合歡期世昌歡情一何短離思一何長嗟彼
籬下菊含英揚其芳晨霜秉貞節寧隨秋草黃終當采
而佩歲晏夫何傷

河東有織女皎皎雲為章手弄機上絲日夕更七襄織

成五色文欲製君子裳莫言隔秋水可以駕飛梁
眈彼牽牛星終日不服箱

故人萬里別海水日夜深南風海上來遺我雙南金
不見故人面乃見故人心鑄作黃金徽置之白玉琴
彈為別鶴操間以懷湘吟曲終聽者稀矯首望知音

庭樹日已黃白髮日已短候蟲鳴前除秋霜蕙花晚
歲月如奔駒六轡不可挽泛舟涉方瀛方瀛水清淺
安期邈難求吾擢亦已返花開醉復斟黍熟飢自飯
適然樂

悟生瑤島諒不遠

分題賦載酒亭送友人之四川

大江發巴蜀岷峨蔚嶕嶢子雲性佚蕩逸氣相扶搖灑
翰騁雄辭凌雲何飄飄終焉歛其華組麗不足驕覃思
著玄文斟酌倣繇文閎言極幽微繇絡天地交豈無好
事者載酒與遊遨胡為事黃門投閣竟蕭條龍蛇不知
藏螻蛄亦見朝天獨昌其文炳如日星昭子行登斯亭
英爽或可招謂我欲問奇峽水阻且遙

題雪獵圖

健兒善騎射出獵古戰場白雪日夜飛蕭蕭朔風涼黃
草蔽沙磧馬肥弓力强小隊出漠南十騎如龍驤前驅
逐猛虎後騎接飛獐翻身激羽箭疊中兩羚羊元熊何
前却猛氣亦跳梁南行顧長戟北走脫飛鎗聯鑣愈奮
捷性命不得將自謂足馳騁意氣何揚揚寧思漢廷將
英勇際武皇去年出雲中置郡定朔方今年戰高闕夜
圍右賢王小勇何足矜萬里開邊疆

兵退後作

朔風號枯枝長夜何漫漫微月出復沒零露淒以漙露
漙不足悲嚴霜為之寒飢鳥下叢薄猛虎鳴其間鬼燈
照虛館落葉何珊珊蕭蕭遠征人載歌行路難我心增
慘戚豈不思東還欲濟川無梁中道多阻艱弱子病且
死老妻方憂患明將登前途念我衣裳單斧冰汲澗水
采薪事朝餐慨彼下泉詩悠然起長歎

泛舟新湖塘次王敬初韻

二首

清賞各有適何異同登攀君舟泊西隩我車上東山林
光變宿雨溪響洄晴澗春深飛花歇日入好鳥還佳景
欣所得毋令清興殘俯看縱壑魚仰見培風翰物理固
有待努力當希顏胡為念窮達戚戚天壤間

湖水日已綠理擢不可緩雜花當晝翻遠樹出雲短沙
明宿雨霽風急游絲斷悠悠歡賞深歷歷佳趣滿酒盡
客愁生歌殘離思遠世路方險巇窮居正蕭散出處諒
何心夕陽起樵管

早春寄鄉中友人

故園花發春又來
碧桃半拆棠梨開
流鶯踏花酒落杯
花飛落酒相縈迴
酒酣起舞落日晚
應念長安人未回
江上舟幾時發
拍手醉唱歸去來
笑摘花枝簪白髮

雲中兩烈婦

珠展鎮雲中
縱游兵掠鄉鄙
張思孝妻華氏偕
子婦劉罵賊死之作
雲中兩烈婦

雲中兩烈婦
風節何雄哉
婦姑誓同死
軍馬倏已來
姑

言我死命所遭爾方年少不得逃欲自經不得索欲自
刎不得刀少婦潛致詞不用刀與索兒當激賊怒婦姑
頭共所姑如湛盧劍罵賊獵獵生剛風婦如黃間弩蹶
張放弦氣愈雄厲聲奮激膺賊鋒萬古雙烈誇雲中

題趙仲庸鏡湖圖為洽上人作

趙侯胷中有泉石白髮垂顛人不識丹青不寫四十年
一見洽師雙眼碧當年王宰浪得名十日五日勞經營
天機到時一揮灑白雲顛倒秋波明秋波在屋下白雲

在屋上香鑪秦望天東南蒼巒翠巘森相向三山落日
煙水賒秋風舊宅今荷花斷垣蒼石無路入至今人說
放翁家放翁家渺何處阿師出家不歸去不惜千金買
畫圖笑倚清江看雲樹

長江霽雪圖

昔年壯游下江漢霽雪千峰排兩岼今年看畫憶舊游
萬里江山入清翫岷峨岡脊來蜿蜒青城一峯高插天
東馳衡山走千里匡廬五老下與石城北固遙相連永

巖雪壑互起伏照見日華破初旭神光混茫元氣浮奮
如巨鼇簸坤軸爛如秋空雲浩如滄海濤又如瑤臺銀
闕天上頭皎皎白月空秋毫回光下照中流水風吹河
漢銀雲起中流空闊不勝寒一洗丹碧秋漫漫山川歷
歷真偉觀來往十年游未半不如雲瀛樓上來倚闌一
日看徧江南山

題俞景山畫山水帳

老大索居江上樓廿年不出懷舊遊叩門下樓出迎客

但見絕壑風颭颭岱宗日觀山上頭日出未出蒼煙浮
嵩高插天太華碧蛾眉青城翠欲流匡廬老泉挂白石
蒼梧水落湘江秋懸厓倚天萬山立翔鸞舞鳳蟠蒼虬
幽岑遠樹互出沒白雲不散松風收松根老樵列四五
招我共入青林幽平生游歷走不遍千里萬里窮遐搜
如何一日墮我前空翠雜沓來雙眸舉頭問客何因入
此境迺是手持畫圖來滄州俞君作畫時雅有山林癖
朝登秦望山萬壑千巖淨橫臆暮上香爐峰海色秋清

上遙碧歸來放筆倣董源筆底丹青浩無迹海桑一別
三千年山月江風耿相憶仰觀巖上泉俯看松下石故
人不見空畫圖十幅雲煙卷還客

梧桐樹

梧桐樹一葉墮秋風一葉委秋露明年二月新葉生還
在今年葉飛處漢宮飛燕近承恩零落班姬不如故君
不見梧桐樹

分題賦鏡湖送張用中

鏡湖白波木葉稀涼風蕭蕭入客衣
季真賜宅已無主
太白酒船空櫂歸野色驚秋鴻雁下水聲吹雨鯉魚飛
此時張翰吳中去雲鎖稽山失翠微

題趙仲穆秋山圖

人家水檻接山窗好在江南山水邦
兩岸雲林皆落日
一天鳬雁共秋江屋頭數徧青巒九松下吟成白石雙
野服何人正蕭散泊船歸醉酒盈缸

題畫菜

今日荷鉏倦嘉蔬沒四垣客來春酒綠風雨夜開園

春深即景

露梢黃鳥啄來禽
蛙葉青蟲絡樹陰
又是綠階春雨歇
滿庭芳草落花深

題秦淮送別圖

綠酒斟來且莫斟
酒闌歌罷去駸駸
別懷恰似秦淮水
流到長江綠更深

題林處士觀梅圖

放鶴仙人不可招，斷河殘月夜聞簫。
別來欲問春消息，花落西泠第二橋。

揭

軌

五首

軌字孟同，臨川人。洪武初，以明經舉，除清河主簿，升知縣。謝歸教授，生徒召定，書傳會選。

沈山子云

孟同詩以唐人為圭臬，斤斤不爽，方之高，浸士差優。

河北冰泮放舟歸江南，奉寄楊南宮。

曉來銅雀東風起，春水凌亂漳河水。
郎官驚起解歸舟，

一日風帆可千里侵晨鼓柁發臨清薄暮乘流下濟寧
南宮先生先我去花時想達瓜洲步尋君何處抽風帆
杏花煙雨春江南

春陰

梨花門巷泥活活楊柳窗戶綠陰陰軒車不來又幾日
風雨相思勞寸心舒州紅稻宜晚飯采石碧酒供滿斟
故人何可久不見我有新詩思共吟

過燕都故宮

八月金輿度玉闕芙蓉零落後庭間西宮無復羊車過
南苑猶疑鳳吹還承露金盤留海上廣寒瓊戶鎖人間
翠華此日知何在黃葉蕭蕭萬歲山

晚歸

苑外金波映水天歸驄蹀躞暮江邊鳳皇臺閣初含雨
燕子人家又禁煙詩寫桃花歌扇底酒攜楊柳舞樓前
請看秋雨胭脂井好醉春風玳瑁筵

宴南市樓

詔出金錢送酒壚綺樓勝會集文儒江頭魚藻新開宴

苑外鶯花又賜醕趙女酒翻歌扇濕燕姬香襲舞裙紆

繡筵莫道知音少司馬能琴絕代無

姜明叔云國初於金陵聚寶門外建

輕煙落粉梅妍柳翠十四樓以聚四方賓客觀揚馬同詩可知國初播紳宴集皆用官妓與唐宋不異後始有

禁

詩話永樂中蜀人晏振之金陵春夕詩云花月

春江十四樓十四樓者來賓重譯清江石城龍

鳴醉仙樂民集賢謳歌鼓腹輕煙淡粉梅妍柳

翠也姜明叔家塘詩話謂皆在聚寶門外城中

既以清江石城為名必不皆在聚寶門外司吉

父撰金陵項事謂有十六樓在城內者曰南市

曰北市在聚寶門外之西者曰朱賓在聚寶門
外之東者曰重譯在瓦屑壩者曰集賢曰樂民
在西門中街北者曰鳴鶴在西門中街南者曰
醉仙在西門南街者曰輕煙曰淡粉在西門北
街者曰柳翠曰梅妍在石城門外者曰石城曰
謳歌在清涼門外者曰清江曰鼓腹所載特詳
楊用修藝林茂山遺南市北市陳魯南金陵世
紀遺清江石城因曲就十四樓之目而誤也相
傳定正蔡傳書成宴編纂諸臣於醉仙樓上然
揭孟同詩云詔出金錢送酒壚綺樓高會集文
儒題曰宴南市樓則非醉仙明矣寶錄洪武二
十七年八月庚寅新建京都酒樓成先是上以
海內太平思欲與民偕樂乃命工部作十樓於
江東諸門之外令民設酒肆以接四方賓旅既
又增作五樓至是皆成賜百官鈔宴於醉仙樓
九月癸丑定正蔡傳書成賜諸儒宴及鈔俾馳

驛還是則編纂諸儒先與百官並賜宴者醉仙樓也繼以書成賜宴者南市樓也蓋酒樓本十六其一北市樓建後被焚此實錄止言增建五樓也當日諸樓皆有官妓不獨輕煙淡粉侮妍柳翠為然故李公泰叔通集句詩於北市則云極目亂紅妝於集賢則云妙舞向春風於清江則云時轉過雲聲於鼓腹則云舞破日初斜於石城則云翠袖拂塵埃於朱賓則云煙花象外幽於鶴鳴則云白日移歌袖而孟同詩云詩寫桃花歌扇底酒攜楊柳舞樓前又云龍虎關河深錦繡鳳皇樓閣麗煙花入云趙女酒酣歌扇濕燕姬香襲舞裙紆追憶承平都會之盛君臣相遇之隆亦一段佳話也

童翼

四首

冀字中州金華人洪武丙辰被徵修書後為湖

州府學教授調北平坐罪卒有和陶集

姚廣孝云中州

才力老成問學淹貫二十年來奔走南北雖涉
歷世故樂人知命有合於情節之志趣其和詩
如蘭抽象更略不見其
銀宕明有牽強者耶

庚子歲五月中從都還阻風于規林

我昔少年日無事幸休居佩弦戒性緩每師董安于迨
茲桑榆景始悟失東隅屢將孱弱軀觸目風波塗嚴冬
朔風急夜截高郵湖豈不辛利涉為計良已疎古人誠

垂堂況我疾病餘前途諒多險欲悔將焉如

水車行

零陵水車風作輪緣江夜響盤空雲輪盤團團徑三丈
水聲却在風輪上大江日夜東北流高岸低坼開深溝
輪盤引水入溝去分送高田種禾黍盤盤自轉不用人
年年祇用修車輪往年比屋搜軍伍全家載下西涼府
十家無有三家存水車卧地多作薪荒田無人復愁旱
極目黃茅接長坂年來兒長成丁夫旋開荒田納官租

官租不闕足家食家家復藉水田力一車之力食十家
十家不憚勤修車但願人長在家車在軸不憂禾黍秋
不熟

蜀泥行

朝蜀泥暮蜀泥河水澆田河岸低吳中有田多鹵斥河
水高於田數尺雨淋浪拍岸善崩歲歲蜀泥增岸塍載
泥船小水易入船頭踏人船尾立吳兒使竹勝使篙竹
筐漉泥如濁醪此身便作淘河鳥河水終多泥漸少君

不聞越上之田高於城連車引水千尺坑車聲軋軋夜
達明田間濁水無時盈吳田苦澇越苦旱越水常枯吳
水滿嗟乎世間至平惟水猶不平請君不用觀世情

贈丹崖隱者

吾聞零陵東有丹崖山青天削出青孱頑丹梯百丈不
可得仙人煉藥巢其間丹成仙去已千載至今草木餘
清寒我來弔古訪陳迹石磴側足難躋攀上有撐雲拄
日之喬松下有懸崖噴壑之驚湍幽林野鳥作人語陰

澗或有蛟龍蟠何人結屋倚蒼翠抱琴林下聽潺湲乃
是丹崖仙人老孫子少年早脫名利關祇今五十如處
子雙鬢鴉墨顏渥丹門前種秫釀春酒屋後藝菽供朝
餐留我石上煮清茗松花落地雲斑斑我家金華五十
里失身作客天南端徵書昨夜趣歸興葉舟徑下湘江
灘弘文館深難置足神武門高宜掛冠山中草屋幸無
恙拂衣歸共浮雲間明年花開儻相憶把酒相望興長
歎

趙撝謙

一首

撝謙名謙一名古則餘姚人洪武初徵修正韻
出為中都國子監典簿罷歸尋以薦召為瓊山
教諭卒於官有考古餘事

黃太沖云先生詩有
考古餘事千篇未曾

世傳

詩話明祖正韻一書出自獨斷天子考文諸臣
敢不敬應撝謙於六書四聲最精焉肯盡棄其
學而順帝之則其見點也必因不苟附和而然
不在年少也既歸築考古臺述聲音文字通書
成賦詩云文字聲音歡久此十年辛苦事研磨
雖云沈約知音甚未許揚雄識字多魚魯從今

堪辨析鼎禹由昔費序浮總憐朋舊微鍾子歸
卧雲山看薜蘿當知臺名考古心非正韻為今
矣

古風次倪安道韻

荒哉周穆王八駿窮萬里朝發崑崙巔夕飲瑤池水空
歌白雲謠千載汙人耳三復祈招詩感歎不能已

明詩綜卷八

謹案第三十頁前六行珠展舊作竹貞今改

總校官庶吉士臣張能照

校對官編修臣閔懋大

謄錄監生臣楊仁基

欽定四庫全書薈要

集部
明詩綜卷九

詳校官編修臣王天祿



欽定四庫全書薈要卷二萬四百八十二

集部

明詩綜卷九

翰林院檢討朱彝尊編

啓
一百三十八首

啓字季迪長洲人洪武初召修元史授翰林院
國史編修官擢戶部侍郎放還尋坐法死有鳳
臺吹臺江館青丘南樓槎軒姑蘇雜詠等集自
選為缶鳴集景泰中吳人徐庸彙為大全集

王
子

充云季迪詩爲逸清麗如秋空飛集盤旋百折
招之不下又如碧水芙蓉不假雕飾翛然臺外

謝玄齡云季迪之詩緣情隨事因物賦形縱

橫百出開闔變化其體製雅醇則冠裳委蛇佩

玉而長裾也其思致清遠則秋空素鶴迴翔欲

下而輕雲露月之連娟也其文采縟麗如春花

翹英蜀錦新羅其才氣俊逸如秦華秋隼之孤

鶩嘒奇八駿追風躡電而馳也吳原博云季

迪雄不敢當子美高不敢望晉魏然能變其格

調足以彷彿韓柳王岑劉欽謨云季迪詩多

激烈慷慨雄偉奇古浩乎如大川之決防也

乎如洞庭之張樂也儼乎如幽壑之舞蛟也

李省之云國初稱高楊張徐季迪才力聲調過

三人遠甚百餘年來亦未見卓然有以過之者

陳約之云洪武初台蒙元體頗存纖詞時則

季迪爲之冠徐子元云季迪盛隆雄秀嶽海

渾涵海內詩宗豈惟吳下
楊用修云李迪一
變元風首開大雅
王元美云李迪如射鵰兒

仇健急利往往命中又如燕姬靚妝巧笑便辟
王敬美云李迪才情有餘使生弘正李何之
間絕塵破的未知鹿死誰手楊張徐故是草昧
之雄勝國餘業不中與高作僕
穆敬甫云高
詩奇拔爽朗可並唐之燕許
胡元瑞云國初
稱高陽張徐李迪風華穎邁特過諸人同時若
劉誠意之清新汪忠勤之開爽東海史之峭拔
皆自成一家人足相羽翼劉崧貝瓊林鴻孫賁抑
其次也又云高太史格調體裁不甚逾勝國而
才具潤翻風骨穎利則遠過元人昭代初雅堪
禘禘
顧玄言云高侍郎始變元李之體首倡
明初之音發端沈鬱入趣幽遠得風人激刺微
旨足以嗣響或唐
李時遠云李迪詩穠麗而
無粉澤清新而復高古優入盛唐
何元谷云

欽定四庫全書

卷九

李迪矩瘦全唐獨運胸臆近體不無中晚纖弱
之調尚沿元季餘風陳卧子云李迪詩如渥
洼生駒神駿可愛特未合和鸞之度耳李舒
章云李迪如春池黃鳥游目可念宋韓文云
李迪妙有才情翩翩矯逸明初詩人允宜首推
繆天自云李迪詩自古樂府文選玉臺金樓
諸體下至李杜王孟高岑錢郎劉白韋柳韓張
以及蘇黃范陸虞揭靡所不合此之謂大家誦
青丘子歌其自負亦不淺矣

靜志居詩話侍郎跌宕風華鳳觀虎視造邦巨
擘所不待言而何仲默別推袁景文第一試合
諸體觀之素自非高敵也世傳侍郎賈禍因題
宮女圖其詩云女奴扶醉踏蒼苔明日西園侍
宴同小犬隔花空吠影夜深宮禁有誰來孝陵
猶忌情或有之然集中人有題畫犬詩云獨兒

初長尾茸茸行響金鈴細草中莫向瑤階吠人
影羊車半夜出深宮此則不類明初掖庭事二
詩或是刺庾中君而作
好事者因之傳會也

行路難

君不見盤中鯉暫失風濤登俎几君不見枝上蜩纔出
糞壤凌雲霄推移變化詎可測勿謂明日同今朝出乘
高車入大馬半是當年徒步者悠悠行路莫相欺為雌
為雄未可知

少年行

下直平明出禁門笑提博局伴王孫寶刀不敢將輸却
明日沙場欲報恩

悲歌

征塗嶮巇人乏馬飢富老不如貧少美游不如惡歸浮
雲隨風零落四野仰天悲歌泣數行下

李時遠云
不數漢魏

阿那瓌

牛羊草漫野大帳天山下十萬控弦兒聞箎齊上馬

吳明

卿云
仇健

野田行

白楊樹下誰家墳火燒野草碑無文路傍尚卧雙石馬
行人指是故將軍當時發卒開陰宅千里送葬城東陌
子孫今去野人來高處牧羊低種麥平生意氣安在哉
棘叢暮雨棠梨開百年富貴何足恃雍門之琴良可哀

秋風引

嗟爾秋風胡為來哉奏商律兮瑟颯而悲哀叩喬柯而
隕葉掃廣路以清埃入班姬之永巷過襄王之高臺瑤

琴自鳴羅幃齊開馬蕭蕭而嘶起鴻噉噉以翔迴使崩
雲駭浪震蕩於白日兮忽欲去而徘徊客有懷鄉失職
而對此者恨盈襟而難裁但欲變天地之搖落不知感
節序之推頽秋風生歸去來

鍾廣漢云
善學太白

秋江曲送顧使君

秋江月滿秋潮大江上行人待潮過別離休說渡江難
半日順風船穩坐楚江茫茫葭茨平使君來時雄雉鳴
子弟從軍隔江去幾家猶住夕陽城水田雖荒飯常足

焚米夜舂二十斛誰道繁華不及前戶無征稅官無獄
渡江渡江君莫留江北樂似江南秋

鑿渠謠

鑿渠深一十尋鑿渠廣八十丈鑿渠未苦莫嗟吁黃河
曾開千丈餘君不見賈尚書

城虎詞

候潮門開啼早鴉有虎忽入居人家母兒畏竄雞犬伏
排籬突戶誰能遮寧風動樹初哮吼驚起東營捉生手

怒拔長戈試一春
目光落地倭魂走
南山藜藿深冥冥
白日橫行誰敢撓
何為離窟來城市
牙爪雖全不能恃
君不見壯士遭急縛
失路窮時亦如此

春江行

春江南北疑無岸
綠草綠波連不斷
一女紅妝出浣紗
恰如鏡裏見桃花
袂衣猶冷過寒食
雲度春陰半江黑
浦口風多潮正深
輕舟搖蕩愁人心
鷓鴣暮啼歸路遠
飛絮茫茫楚王苑

廢宅行

鳴珂坊裏將軍第，列戟齊收朱戶閉。
里媼逢人說舊時，有廬被奪廣園池。
今年沒入官為主，散盡堂中義宅兒。
厨煙久斷無梁肉，羣鼠飢來入鄰屋。
官封未與別人居，日日間苔雨添綠。
曲閣深沈接後房，畫屏生色暗無光。
尋常不敢偷窺處，守卒時來拾墜璫。
春風多少奇花樹，又有豪家移得去。

牧牛詞

爾牛角彎環我牛尾禿速共拈短笛與長鞭南隴東岡
去相逐日斜草遠牛行遲牛勞牛飢惟我知牛上唱歌
牛下坐夜歸還向牛邊卧長年牧牛百不憂但恐輸租
賣我牛

養蠶詞

東家西家罷來往晴日深窗風雨響二眠蠶起食葉多
陌頭桑樹空枝柯新婦守箔女執筐頭髮不梳一月忙
三姑祭後今年好滿簇如雲繭成早檐前繅車急作絲

又是夏稅相催時

憶遠曲

楊子津頭風色起郎帆一開三百里江橋水柵多酒壚
女兒解歌山鷓鴣武昌西上巴陵道聞郎處處經過好
櫻桃熟時郎不歸客中誰為縫春衣陌頭空問琵琶卜
欲歸不歸在郎足郎心重利輕風波在家日少行路多
妾今能使烏頭白不能使郎休作客

里巫行

里人有病不飲藥神君一來疫鬼却走迎老巫夜降神
白羊赤鯉縱橫陳男女殷勤案前拜家貧無穀神勿怪
老巫擊鼓舞且歌紙錢索索陰風多巫言汝壽當止此
神念汝虔賒汝死送神上馬巫出門家人登屋啼招魂

陸水修云如此章法入
之張王樂府幾不能辨

王客行

主人楚歌客楚舞落日黃雲雁聲苦笑拂腰間寶劍光
美人滿堂色如土大兒北海人中奇小兒能讀曹娥碑

相逢且莫歎貧賤但願有酒無別離君不見平原墓上
生秋草國士無窮道苟老

新絃曲

舊絃解新絃張冰絲牽愁六尺長寬急頻從指邊聽金
雁參差移不定新絃響高調易促不如舊絃彈已熟憐
新厭舊妾恨深為君試奏白頭吟他日愁如舊絃棄泣
向羅裙帶頭繫

竹枝歌

楓林樹樹有猿啼若箇聽來不慘悽
今夜郎舟宿何處
已東不在定巴西

照田蠶詞

東村西村作除夕高炬千竿照田赤
老人笑祝小兒歌
願得宜蠶又宜麥明星影亂棲烏驚
火光辟寒春已生
夜深然罷歸白屋共說豐年真可卜

擬古 二首

美人一相見遺我白玉環
上有雙雕龍遊戲在雲間持

此感深意佩結無時間玉以比貞潔環以明不絕雲龍
永相從誰能使離別

黃鳥鳴春陽流芳滿西園攀條日已暮悵惋不能言禦
寒必重裘涉道須雙轅離居非君子何以解憂煩煩憂
日已積佳期日已失思君如蓬萊可望不可即區區儻
見察憔悴甘自畢

寓感 六首

美女生貧家光豔人未識遠聘入楚宮揚蛾欲傾國朝

游瓊臺上夕侍金輿側奉歡擬千齡秋風失顏色銜恩
歸永巷貞意徒寂然高高天上星墮作水底石人事盡
如斯推移歎何極

志士徇功業貪夫詫輕肥亦有逃羣子矯矯與時違彼
此更共笑不知誰是非達人體自然出處兩忘機浮雲
游天表舒卷有餘輝

攬轡登太行遙望洛北州峭函正西峙黃河復東流百
城無遺堵雲煙莽相繆朝作冠蓋場暮為狐兔丘昔人

爭此地干戈迭相讎當其得意時連陌擁鳴騶百年奄
忽盡魂魄空來游曷見采芝叟冥棲無所求

短褐乘輶輅狐裘駕文車西門與北宮窮達一何殊彼
達矜已智此窮媿身愚東郭發至言兩惑各以祛厚薄
有定命巧拙果誰歟歸卧掩蓬室道存何所吁

潁陽在川上玄蟬夕鳴悲嫋嫋風起波翻翻葉辭枝曠
望天宇內沈寥此何時朱火已盈謝清商屆其期覽鏡
忽自嗟綠鬢生素絲萬物有榮悴造化豈吾私

南山多浮雲北山有高樹因風暫來依風回復飛去兄弟滿四海幾人此相遇握手交百懽分襟滋千慮蹤跡不可常無為嗟去住

始發南門晚行道中

歲暮寒亦行征人有常期辭我家鄉樂適彼道路危酒闌別賓親驅車出郊岐我馬力未痛已越山與陂回頭望高城落日雲樹滋遭亂既少安謀生復多飢塗逢往來人孰不為此馳遠遊亦吾志去矣何勞悲

早過蕭山歷白鶴柯亭諸郵

客起何太早村荒絕雞鳴況時江雨晦不得見啓明凌
兢度高關山空縣無城隔林聞人呼已有先我行側身
避徑滑聚足防厓傾衣寒復多風聒聒遠水聲千峰霧
中過不識狀與名嵐開見前郵始覺歷數程越禽啼楓
篁冷日傍午晴煙生沙墟寂葉落澗寺清登臨亦可悅
但恨時未平

聞長槍兵至出越城夜投龕山

列藩遏戎亂駐鉞實此州如何殺大將王師自相讎我
來亂始定城郭氣尚愁又聞有鄰兵倉卒豈敢留促還
出西門天寒絕行輶古戍暗雨雪旌旗暮悠悠野屋閉
不守澤田棄誰收居人且奔逃游子安得休逶迤蒼山
去決潸玄雲浮人虎爭夜行風榛嘯巖幽我徒戒相親
一失未易求飢食谷口粟寒燒澗中櫛神迷路多迂再
宿達海陬雖嘗登頓勞幸免迫辱憂聖尼畏於匡嗟我
敢有尤但慙去越早不遂名山游

夜抵江上候船至曉始行

夜辭西陵館霜谷叫猿歇津卒未具舟天險不可越漁
商雜候渡寒立沙上月蒼煙隱遙汀益覺潮漲闊開橈
散驚鳬海色曙初發矚矚前山來稍稍後嶺沒中流聞
鼓角隔岸見城闕客路得奇觀臨風悶俱豁

登鳳皇山尋故宮遺跡

茲山勢將飛宮殿壓其上江潮正東來朝夕似奔轡當
時結構意欲敵汴都壯我來百年後紫氣愁不王烏啼

壁門空落葉滿陰障風悲度遺樂樹古羅嚴仗行人悼
降王故老怨姦相蒼天何悠悠未得問興喪世運今復
哀淒涼一同望

宿湯氏江樓夜起觀潮

舟師夜驚呼隔浦亂燈集潮聲若萬騎怒奪海門入初
來聽猶遠忽過睇無及震搖高山動噴灑明月溼霜風
助翻江蛟龍苦難蟄應知陰陽氣來往此呼吸登樓覺
神壯憑險方迴立何處望靈旗煙中去波急

過奉口戰場

路迴荒山開如出古塞門驚沙四邊起寒日慘欲昏上
有飢鳶聲下有枯蓬根白骨橫馬前貴賤寧復論不知
將軍誰此地昔戰奔我欲問路人前行盡空村登高望
廢壘鬼結愁雲屯當時十萬師覆沒能幾存應有獨老
翁來此哭子孫年來未休兵彊弱事并吞功名竟誰成
殺人遍乾坤愧無拯亂術佇立空傷魂

舟次敢山阻風累日登近岸荒岡僧舍

高岸鳴枯桑湖陰北風厲寒濤洶我前幾日不得濟孤
舟恐漂蕩石根暮牢繫憂來厭間卧近寺聊獨詣雀飢
殘林空人倦危磴細年荒無居僧樹死石門閉神傷却
欲返微霰灑征袂窮冬已崢嶸故國尚迢遞仰看浮雲
馳東路阻歸計長歎復何言吾生信多滯

過硤石

硤石頗奇壯長河出連山絕壁兩岸開行舟過其間高
處誰解登陰藤裊難攀旁垂雨痕古仰露天光慳不知

真宰意隨地設險艱一夫據蜀閣二世憑秦關賴此非要區爭奪得少間徘徊佇望久日暮飛雲還

登海昌城樓望海

百川浩皆東元氣流不息混茫自太古於此見容德積陰漲玄濤萬里失空色鴻鵠去不窮魚龍變莫測朝登茲樓望動蕩豁胸臆始知滄溟大外絡九州域日出水底宮煙生島中國寬疑浸天爛怒欲吹地屢常時烈風興海若不受職長堤此宵潰頻勞負薪塞況今艱危際

民苦在墊溺有地不可居
瀕洞風塵黑安得擊水游
圖南附鵬翼

秋懷

四首

明月出遠林流輝鑒牀幃
促促草下蟲催我索故衣起
歎秋夜長欲取鳴琴揮掩抑
不成弄中心復乖違有懷
難自宣勿謂知音稀

涼風動幽幔高堂夜空虛
明燈無與語聊讀古人書
古人亦何人使我不得如棄
卷輒還卧終宵自欷歔

朝游荒岡陞暮行空潭側我非楚大夫何有憔悴色良
辰思遠騁周道廣且直我馬力不前回駕仰偃息踟躕
阻修竹日夕睇西北苟安非予志所懼時未識

弭櫂望江涘日落青楓林驚波駛且廣蕩漾浮雲陰靡
靡臯蘭哀噦噦渚鴻吟顧此凜節謝憂來忽傷心宋子
悲已多潘生歎彌深自古有此愁誰云獨吾今

出郊抵東屯

三首

故鄉一區田自我先人遺賴此養吾懶不耕坐待炊霜

露被寒野屬當斂穫時年來徵薄入稅駕宿東陂今年
雖未豐亦足療我飢萬鍾知難稱保此復何辭

芻芻雞登場秋稼恨狼籍疎榆蔭門巷景暗燈火夕田
家雖作苦於世寡憂戚況當收穫景斗酒復可適所以
沮溺徒躬耕不辭劇

坐久體不適卷書出柴闕臨流偶西望正見秦餘山野
淨寒木疎川長暝禽還此中忽有得怡然散襟顏遂同
樵牧歸歌笑落日間

顧榮廟

有序

晉侍中顧彥先有墓并祠在長洲之東久而廢
為淫祀縣令周君復之為賦是詩

軍司吳國秀神機夙超朗弱冠游洛師已蒙南金賞
崎嶇諸王幕沈湎務遵養中罹廣陵艱計服匪誠枉風雲
一揮扇義旅臻同響事成恥言勲飄然理歸鞅晉社始
東遷羣賢悉收獎道謁真感會矯翼丹霄上德聞一代
稱跡泯千齡往時屯乏良佐英謨益堪想墳祠託荒郊

蕭條並榛莽
荒童侵雨隧
淫巫闖塵幌
大夫過停轅
式瞻為含愴
衣冠復故貌
筵几陳新享
寡劣忝鄉人
因歌

表遐仰

李舒章云
似謝康樂

答張山人憲

聽君辛苦詞
感我艱難情
百年自有為
安用文章名
雞鳴海光動
車馬塵滿城
相逢無新舊
言合意自傾
奉觴置君前
長歌發哀聲
時平苟未得
飲此全其生

澄景閣夜宴

王孫喜留宴開閣望明河是夕月微暈涼風池上多棲
禽翻暗叢駭魚動圓波清景厭絲竹雅詠答高歌尊酌
願勿間良宵易蹉跎預憂別在旦車馬層城阿

九日無酒步至西汀間眺

高天無游氛秋氣自激肅離居時節變霜降未授服蕭
條野田間晨步聊遠矚悠悠寒川駛靡靡晴巒矗菊叢
有清香木葉無故綠親朋去我遠登高且連躅孤懷誰
知音惆悵臨水曲名酒不可尋歸來掩茅屋

贈談鬼谷數瞽師金松隱

我聞鬼谷子乃是古仙真避世青谿中不汙戰國塵著
書十三章當年授儀秦二子不善用竟皆殺其身瞽師
得異傳相去逾千春不為從衡說談數妙入神往年客
南都蓬門集朱輪下簾論玄理驚動金陵人歸來隱虞
山繞廬樹松筠誰言目無睹內照靈光新緬思大化根
生此下土民起滅千萬塗孰能究其因或愚騁結駟或
賢被懸鵲命也可奈何天道誰疎親世事昧守常毋使

徒紛綸

始遷西齋

乍懸南樓榻始布西齋筵西齋非吾廬幽淨亦可憐風
牖竹裊裊露庭菊鮮鮮圖史左右陳永日坐一氊婉孌
數童子哦誦當我前為爾竟寂寂低徊欲窮年讀書將
何為乃與始志愆進無適時材退乏負郭田我生非匏
瓜謀食有道焉苟得隨羣趨顧此不稍賢飲餘解衣卧
毋嘲腹便便

題陳生畫

前村夕陽明後嶺秋嵐積葉落露山村潮來沒江石遙
遙射雁子慘慘聽猿客何事下征帆西陵渡頭驛

青丘道中

霖雨江暴溢奔流絕津涯茫茫野田白何由見春華居
人久已亡流萍滿其家昔我過此土極目桑與麻故道
不可尋舟行但蒹葭歲凶豈宜客四顧空長嗟

秋風

秋風屋外來落葉紛吾傍不出門幾日我樹如此黃但
覺成懶性焉知逝顏光朝餐止一盂夕卧惟一牀仲尼
欲行道轍跡環四方而我何為者不與世相忘

大水

吾鄉水為國自昔稱漏天今年尤苦霖冒此上下田老
農愁相告無有二十年東江入門流比屋如敗船夜卧
牀屢移晨炊釜常懸涼風吹蒲稗羣鵝鳴我前茫茫失
川塗出行竟回遘斯民欲昏墊天意豈不憐陰陽致乖

卷九
泠孰能究其然歲飢尚勿憂黽勉當食鮮

毛公壇

欲觀漢壇符東上縹緲峰葛花墜寒露夕飲清心宵月
出太湖水鶴鳴空澗松真境久寂寥蒼苔閱靈蹤嘗聞
綠毛叟變化猶神龍世人豈得見偶許樵夫逢攀險力
易疲探玄志難從歸去白雲外空聞仙觀鐘

吳桓王墓

朝出南郭門高墳鬱蒼蒼借問葬者誰乃是長沙王黃

腸豈不錮盜發取所藏金環出世間封樹無輝光緬想
哀炎際當塗逞姦強英雄失所據虎視誰敢當王初奮
穉孤英風凜飛霜談笑定江東賢豪歛來翔少假須臾
年足見霸道昌何為困仇奴輕獵不自防天意豈佑魏
遽使斯人亡因觀感往事喟焉令人傷

虎丘次清遠道士詩韻

神仙不可羈乘螭躡雲漢豈將避嬴劉荒山事窮竄何
年東觀海一至此峰翫悠悠清詩傳宵宵遺跡漫我來

繼登臨長嘯憤初岸既秋煙蘿疎欲雨風竹亂夜深空
潭黑月吐石壁半龍驚汲僧來鳥喜游客散閣掩林下
夕鐘鳴巖中旦勝賞誰能窮今古付篇翰飛騰子何之
汨沒余可歎安得契真期超然豁靈贊

贈張主簿

離離平阜禾纂纂橫林棗客行愛樂土秋晚華亭道停
燭春紡遲鳴榔潭魚早借問何能然年來縣官好

龍門

龍門何崢嶸此地表竒蹟山分兩厓青天豁一罅白知
非禹功鑿想是鬼手劈長為風雨闕開闔自朝夕深合
未吐雲對峙不崩石日光寒易傾苔色陰更積只宜過
此內便與人境隔始窺已幽深漸入尤險窄暗中把危
藤蜿蜒欲驚魄僧留看古刻敲火照絕壁晚間松竹號
洶若波浪激不知神魚飛到此誰點額

天池

靈峰可度難昔聞枕中書天池在其巔每出青芙蓉湛

如玉女盆雲影含夕虛人靜時飲鹿水寒不生魚我來
屬始春石壁煙霞舒濫濫月出後泠泠雪消餘再汎知
神清一酌欣慮除何當逐流花遂造仙人居

劍池

干將欲飛出巖石裂蒼礦中間得深泉探測費修綆一
穴海通源雙厓樹交影山中多居僧終歲不飲井殺氣
凜猶在棲禽夜頻警月來照潭空雲起噓壁冷蒼龍已
化去遺我清絕境聽轉轆轤聲時來試新茗

練瀆

吳越水為國行師利舟戰夫差開此河
舳艫試新練十萬凌潮兒材比飲飛健
鼓櫂激風濤揚舲逐雷電當時意氣盈
謂已無勾踐鷗避去沙洲龍愁閑淵殿
恃強非伯圖倏忽市朝變臺上失嬌姿
泉間掩殘面至今西山月恨浸秋一片
猶有網魚人時時得沈箭

松江亭

泊舟登危亭江風墮輕幘空明入遠眺
天水如不隔日

落震澤浦潮來松陵驛
繇繇洲淑平莽莽葭莢積
凭闌不敢唾下有龍窟
宅帆歸雲外秋鳥下煙
中夕欲炊菰米飯待月
出海白喚起弄珠君間
吟第三笛

南峰寺

樵歸衆山昏天峰尚餘
景欲投石門宿更度西
南嶺遠聞雲間鐘蘿逕
入寺永懸燈照靜室一
禮支公影鳥鳴澗壑空
泉響窗戶冷對此問山
僧何如沃州境

楞伽寺

夕陽西下嶂返照東湖水來尋古寺遊楓葉秋幾里叩
門山猿驚維馬林鳥起鐘聲出煙去半落漁舟裏楞伽
義未曉塵累方自恥欲打墻銘碑從僧乞山紙

支遁菴

閒登待月嶺遠叩棲雲闕石室閉千載高僧猶未還殘
燈黃葉下古座青苔間不見跏趺影鶴鳴空此山

弔幽獨君

君本何代人姓名復為誰何年棄人間長眠此山陞荆

榛鬱蒙龍孤墳上無碑游魂久未化哽咽還能詩人沒
乃歸滅憂樂豈復知君何獨煩冤猶有親愛思一死衆
所同已矣焉足悲陳辭為相弔此理君當推

剡原九曲

二首

欲知溪流長百轉來越嶠舟行安能極嵐路入斜照清
景不足娛昔人豈辭詔石硯久難磨空林閉遺廟
入江水稍決霜降未可涉頻聞往來人出門即舟楫前
飛鷺鷺遠下飲垂孫健何處問興公風吹赤棠葉

早過南湖

湖黑月未出蒹葭露淒淒
榜人識浦溆不畏荒煙迷
殘夢詎可續舟搖櫓聲齊
開篷望天邊斗柄插水低
津遙未見樹村近纔聞雞
自嗟遠遊人中宵走東西
不如沙頭雁宛頸猶安棲

春日言懷

芳樹何靡靡鳴禽亦喑喑
時物豈不好人事誠多乖憂
來卧間房語笑孰與偕
天道諒不昧薄願終當諧
惟應

守貞靜有酒陶中懷

題畫鷹得嘯字

高風動古壁竦立見蒼鷄軒然欲飛揚嗟此粉墨妙秋
筋束老骨天寒勢逾矯腦枯草中兔氣盡檻上驃健鷗
雖百餘凡材豈同調乾坤正肅殺怒氣號萬竅大野開
平蕪悲臺落殘照荒城有妖狐夜作猛虎嘯為君試一
擊壯士慙勇剽安能飽拳肉側翅隨年少

哭王隅

車行一輪摧鳥奮一翼傷人生失輔友誰當共提將相
逢豈無人不獲如子良朝遊羣彥林夕棄萬鬼鄉春風
吹南原百草萎以長呼君不歸魂割我欲斷腸豈不悟
生滅情至諒難忘

送程校理遊江上

風亭裊離管草綠江水暮送此南浦人孤帆雨中渡別
觴足自緩前驛花滿路春叢戀山鶯晚絮迷汀鷺我今
獨愁居芳月誰與度佇立望遙波相思積煙霧

李舒章
云娟秀

至蓮村

昔愛茲里幽誓將構蓬廬孰云墮世網重到十載餘喪
亂喜獨完煙火靄舊墟柴門在深巷落日榆柳疎鄰翁
念契闊攜筐饋雙魚苦問客何事顏色與昔殊焉知涉
艱難多戚長少娛貧賤非所恥中情在閒居願翁勿相
誚終當遂吾初

移家江上別城東故居

人情戀故鄉誰樂遠為客我行豈得已實為喪亂迫淒

淒顧丘隴悄悄別親戚不去畏憂虞欲去念離隔雖有
妻子從我恨終不釋出門未忍發惆悵至日夕

我昔

我昔在家日有樂不自知及茲出門遊始復思往時貧
賤為客難寢食不獲宜異鄉寡儔侶童僕相擁持天性
本至慵強使賦載馳發言恐有忤蹈足慮近危人生貴
安逸壯遊亦奚為何當謝斯役歸守東岡陂

京師嘗吳杭

新杭粲如玉遠漕來中吳初嘗愛精粲想出官田租我
本東臯民少年習耕鉏霜天萬穗熟恣啄從飢鳥日暮
刈獲歸妻孥共懽呼茆屋夜舂急風雨江村孤晨炊滿
家香薦以出網鱸如今幸蒙恩遨遊在南都門前半區
田別來想已蕪長年盜寸廩補報一事無投匕忽歎息
飽食慙農夫

送周四孝廉後酒醒夜聞雁聲

別時酒忽醒客去唯空舍風雪雁聲來寒生石城夜遙

憶渡江船正泊楓林下

唐昭宗賜錢武肅王鐵券歌

妖兒初下含元殿天子仍居少陽院諸藩從此擁連城
朝貢皆停事攻戰岐王一去梁王來長安宮闕生蒿萊
天目山前異人出金戈雙舉風煙開羅平惡鳥啼初起
犀弩三千射潮水歸來父老拜旌旗醺酒搥牛宴鄉里
擊裘駿馬驕春風錦袍玉帶真英雄詔書特賜誓終始
黃金鏤字旌殊功虎符龍節彤弓矢後嗣猶令赦三死

盡言恩寵冠當時天府丹書未逾此摩挲舊物四百年
古色滿面疑蒼煙天祐宰相署名在尋文再讀心茫然
古來保族須忠節受此幾人還覆滅王家勲業至今傳
不在區區一方鐵人生富貴知幾時泰山作礪徒相期
行人曾過表忠觀風雨斷蘚蘚殘碑

送王太守遷雲間

男屠豬羊女釀酒共禱神祠留太守太守今年遷大州
除書已下誰能留兩州相去無百里失君應愁得君喜

安得如君數十人一時盡福東南民

劉松年畫

樵青刺篙勝搖槳船頭分流水聲響青山渺渺波漾漾
白鷗飛過時一兩載書百卷酒十壺日斜出游女兒湖
鄰舟買得巨口鱸醉拍銅斗歌鳴鳴此樂除却江南無
送葉卿東還

聞君辭家今幾年布衣綫斷芒屨穿江湖夢迴燈火夜
聽雨每憶山中田兵戈忽斷故鄉路雖有兩足歸無緣

上書願雪父兄恥畫地聚米籌山川居然無成困逆旅
白日但看孤雲眠時人不容福生傲坐客豈信毛公賢
黃金已盡酒徒散壯士反為兒女憐飢吟倚壁氣未餒
有似病鵲棲荒煙却欲南遊探禹穴僕夫整駕雞鳴前
波濤翻江畏飢鰐霧雨連海愁飛鳶相逢誰肯問憔悴
山水自為窮人妍乾坤無家去何止飄泊不異迴風船
區區願君自愛惜今古遇合無非天亂離貧賤何足歎
王孫亦在道路邊我今豈少四方志讀書坐破牀頭羶

思讎兩無欲誰報送子空歌寶劍篇

煮石山房為金華山人賦

山人不飯杭稻香笑指白石為餽糧金華之石猶可食
元是舊牧初平羊荆榛拾歸夜深煮自言久服能輕舉
但令隨處有雲根不問青天旱無雨我生無力耕西疇
硯田欲枯抱飢憂便當從君學此術絕勝乞米監河侯
夜發錢清

錢清渡頭船夜開黃茆苦竹聞猿哀客官釃酒水神廟

風雨滿江潮正來蒸飯炊魚坐篷底不覺舟行兩山裏
擢歌早過越王城東方未白啼鴉起

獨遊雲巖寺寄周砥

城西諸山非不奇我游獨與茲山宜紅櫻春開山後寺
白水夏滿山前陂幽居況與山不遠鐘鼓每到空齋帷
雨餘煙中落日下曳杖往讀頭陀碑兩崖蒼蒼日色古
枇杷樹高陰滿池殿燈欲昏上羣鼠墻鈴已靜蹲孤鴟
興來即遊興盡返迎送豈要山僧知困窮喪亂豈無感

正賴此境忘吾悲嗟君何為乃自苦破襪短策塵中馳
挂帆能來亦未晚浦口三日南風吹

贈李外史

仙人飄飄若雲風來去倏忽誰能窮豈惟上界足官府
往往亦在塵埃中我欲尋真向五岳亂後舊路迷榛蓬
天雞未鳴夜谷暗海鶴已去秋壇空丹崖碧澗瑤草歇
洞府一閤無由通陌頭驚逢李道士自說柱史為吾翁
傷人相傳解起死袖裏有丹如日紅我聞安期古策士

親見楚漢爭雌雄終然濁世不肯住渡海竟去先飛鴻
玄洲東望纔咫尺彩霞幻結金銀宮何當共赴食棗約
三花醉折春濛濛迴看城郭煙霧杳大笑下士真沙蟲

聽教坊舊妓郭芳卿弟子陳氏歌

時至正己亥歲作

文皇在御昇平日上苑宸遊駕頻出仗中樂部五千人
能唱新聲誰第一燕國佳人號順時姿容歌舞總能奇
中官奉旨時宣喚立馬門前催畫眉建章宮裏長生殿
芍藥初開勅張宴龍笙奏罷鳳絃停共聽嬌喉一鶯轉

過雲妙響發朱脣不讓開元許永新
繡陞花驚飄豔雪
文梁風動委芳塵翰林才子山東李
每進新詞蒙上喜
當筵按罷謝天恩捧賜纏頭蜀都綺
晚出銀臺酒未消
侯家主第強相邀寶釵珠袖尊前賞
占斷春風夜復朝
回頭樂事浮雲改瘞玉薶香今幾載
世間遺譜竟誰傳
弟子猶憐一人在曾記霓裳學得成
朝元隊裏藝初呈
九天聲落千人聽丹鳳樓前月正明
狹斜貴客迴車馬
不信芳名在師下風塵一旦禁城荒
誰是花前聽歌者

從此飄零出教坊，遠辭京國客殊方。
閉門春盡無人問，白髮青裙不理妝。
相逢為把雙蛾蹙，水調梁州歌續續。
江南年少未曾聞，元是當時供奉曲。
朝使今年海上歸，繁華休說亂來非。
梨園散盡宮槐落，天子愁多內宴稀。
始知懽樂生憂患，恨殺韓休老無諫。
傷心不見昔人歌，汾水秋風有飛雁。
此日西園把一卮，感時懷舊盡成悲。
含情欲為秋娘賦，愧我才非杜牧之。

方隱君山園

吳興城南山水勝竹樹參差萬家映幽深誰似隱君園
車馬不來雞犬靜兩溪迴通柳港曲一峰立對柴門正
東西別墅憐更好孤櫂往來隨晚興總令種菜不種桃
新製長鏡木為柄家童頗解候天時鄰叟還能論地性
交交林路翳復開活活野泉流不定清晨聞鳥欣獨往
濃綠潑晴畦色淨老葉垂根孤蚓號殘英綴梗羣蜂競
乍紫新蔓喜籬長欲送晚芽嫌土硬此時采擷自足飽
肯為食肝煩縣令古來名園悉可數金谷辟疆誇獨盛

鑿石圓開弄月池買花深作行春徑愛妾宵陪秉燭宴
狎朋晝接流觴詠長年懽樂豈知極回首芳菲屬他姓
只今誰解問遺蹤斷甃摧垣無一剗乃知厚業要德守
那得衰榮但言命君能勤儉遺子孫應有嘉名書郡乘
憶昨行寄吳中諸故人

憶昨結交豪俠客意氣相傾無促戚十年離亂如不知
日費黃金出游劇狐裘蒙茸欺北風霹靂應手鳴雕弓
桓王墓下沙草白彷彿地似遼城東馬行雪中四蹄熱

流影欲追飛隼滅歸來笑學曹景宗新擊黃獐飲其血
臯橋泰孃雙翠蛾喚來尊前為我歌白日欲沒奈愁何
迴潭水綠春始波此中夜游樂更多月出東山白雲裏
照見船中笛聲起驚鷗飛過片片輕有似梅花落江水
天峰最高明日登手接飛鳥攀危藤龍門路黑不可上
松風吹滅巖中燈衆客欲歸我不能更度前嶺緣峻嶒
遠攜茗器下相候喜有白首楞伽僧館娃離宮已為寺
香逕無人欲愁思醉題高壁墨如鴉一半歌斜不成字

夫差城南天下稀，狂遊累日忘却歸。
座中爭起勸我酒，但道飲此無相違。
自從飄零各江海，故舊如今幾人在。
荒煙落日野烏啼，寂寞青山顏亦改。
須知少年樂事偏，當飲豈得言無錢。

陳卧子云跌宕淋漓
李舒章云神似太白

洞庭山

朝登西巖望太湖，青天在水飛雲孤。
洞庭縹緲兩峰出，正似碧海浮方壺。
嘗聞此山古靈壤，蛇虎絕迹懼樵夫。
濤聲半夜恐魂夢，石氣五月寒肌膚。
居人仿佛武陵客，

戶種橘柚收為租高風欲起沙鳥避明月未出霜猿呼
中有林屋仙所都銀房石室開金鋪羅浮峨嵋互通達
別有路往非人塗靈威丈人亦仙子深入探得函中符
玄衣使者不暇惜欲使出拯蒼生蘇後來好事多繼往
石壁篆刻猶堪摹千年玉鼠化蝙蝠下撲炬火如飛鳥
玄闕拒閉誰復到似怪衣上腥塵汙勿言神仙事恍惚
靈蹟具在良非誣我生擾擾胡為乎坐見白髮生頭顱
久欲尋真未能去局束世故緣妻孥何當臨湖借漁艇

拍浪徑渡先雙鳧獨攀幽險不用扶身佩五嶽真形圖
夜登天壇掃落葉自取薪水供丹爐此身願作仙家奴
不知仙人肯許無

答余新鄭

前年吳門初解兵君別故國當西行有司臨門暮驅發
道路風雨啼孩嬰倉皇不敢送出郭執手暫立懷憂驚
我時雖幸脫鋒鏑亂後生事無堪營移家江上託地主
間園借得親鉏耒春朝起沐日照屋野卉雜發鳴鸝鷀

思君萬里不可見對此涕淚如盆傾有壺當軒忍自酌
有句在卷邀誰評走投北郭問消息一客為我言分明
君初隨例詣闕下有旨謫徙鍾離城齋無囊金從無僕
棄家獨去何惇惇長淮黏天趣前渡牙眼怖客浮鼉鯨
到州鞠躬謁太守脫去官籍儕編氓城荒無屋寓來客
旋乞廢地誅蓬荊異鄉何人恤同患喜有揚子兼徐卿
日高破竈煙未起閉戶不絕哦詩聲去年聖恩念逐客
特賜拂拭加朝纓勅君赴汴聽銓擢路算舊驛猶千程

沙河無雨夏雲熱茆葦夾岸多蚊蟲舟中感癘得下泄

刀攪腸腹聞呻吟荒塗無藥相救療伏枕兩旬幾殞生
終藉神明佑吉士疾勢漸脫身強輕一官署作新鄭簿
捧檄已去詢田更我雖歷歷聽客語虛實未察憂難平
初春天子下明詔欲纂前史羅儒英菲才亦辱使者召
辭謝不得來南京日斜出局訪君舍草滿陋巷春泥晴
入門小女識父友延拜學訴艱難情且云父意念家遠
新遣兩卒來相迎須臾出君寄我札上有秀句如瑰瓊

自陳前事頗一一與客舊說無虧盈讀終呼卒問彼土
卒言幾年經戰爭河山蕭條縣雖小民少姦詐多淳誠
春秋古稱鄆子國溱洧水活魴魚蘋蘩雌兔咻咻草間走
雄雉角角桑顛鳴谷深稀逢種田者時有射戶棲山棚
霜天赤棗收幾斛剥食可當江南杭官來撫民務無事
鞭挂壁上無敲掬寒廳吏散獨坐嘯遠對嵩少當檐楹
聞之離抱頓舒豁如汲清露醒朝醒便因卒還寄君語
此邑小鮮聊試烹幸逢昌朝勿自棄願更努力修嘉名

吾皇親手擁高筭灑掃六合氛塵清海中篚筐已入貢
隴外戶版初來呈大開明堂議禮樂學士濟濟登蓬瀛
太廟冬烝薦朱瑟千畝春耕垂青紃用材不肯略疎賤
銖寸盡上天官衡況君磊落抱奇器不異一鶚秋空橫
豈容久屈簿領下天道始塞終當亨文章期君歸黼黻
借問報政何時成

京師苦寒

北風忽發浮雲昏積陰慘慘愁乾坤龍蛇蟄泥獸入穴

怪石凍裂生皴痕臨滄觀下飛雪滿橫江渡口驚濤奔
空山萬木盡立死未覺陽氣回深根茆檐老父坐無褐
舉首但望開朝暾苦寒如此豈宜客嗟我歲晚飄羈魂
尋常在舍信可樂牀頭每有松醪存山中炭賤地爐煖
兒女環坐忘卑尊鳥飛亦斷況來友十日不敢開衡門
竭來京師每晨出強逐車馬朝天闔歸時顏色黯如土
破屋暝作飢鶩蹲陌頭酒價雖苦貴一斗三百誰能論
急呼取醉徑高卧布被絮薄終難溫却思健兒戍西北

千里積雪連崑崙
河水踏碎馬蹄熱
夜斫堅壘收羌渾
書生只解弄口頰
無力可報朝廷恩
不如早上乞身疏
一蓑歸釣江南村

張中丞廟

延秋門上烏啼霜
羯兒曉登天子牀
江頭老臣淚暗滴
萬乘西去關山長
公卿相率作降鹵
草間拜泣如羣羊
當時不識顏平原
豈復知有張睢陽
孤城落日百戰後
瘦馬食尾人裹瘡
男兒竟為忠義死
碧血滿地嗟誰藏

賀蘭不斬上方劍英雄有恨何時忘
千年海上見祠廟
古苔叢木秋風荒
摩挲畫壁塵網裏
勇氣曄曄虬鬚張
巫歌大招客酹酒
忠魂或能來故鄉

青丘子歌

青丘子懼而清本是五雲閣下之仙卿
何年降謫在世間
向人不道姓與名
躡屩厭遠遊荷鉏
嬾躬耕有劍任羞
澀有書任縱橫不
肯折腰為五斗米
不肯掉舌下七
十城但好覓詩句
自吟自酬賡田間
曳杖復帶索菊人

不識笑且輕謂是魯迂儒楚狂生青丘子聞之不介意
吟聲出吻不絕咿咿鳴朝吟忘其飢暮吟散不平當其
苦吟時兀兀如被醒頭髮不解擲家事不及營兒啼不
知憐客至不果迎不憂回也空不慕猗氏盈不慙被寬
褐不羨垂華纓不問龍虎苦戰鬥不管烏兔忙奔傾向
水際獨坐林中獨行斲元氣搜元精造化萬物難隱情
冥茫八極遊心兵坐令無象作有聲微如破懸蛭壯若
屠長鯨清同吸沆瀣險比排崢嶸靄靄晴雲披軋軋凍

草萌高攀天根探月窟犀照牛渚萬怪呈妙意俄同鬼神會佳景每與江山爭星虹助光氣煙露滋華英聽音諧韶樂咀味得大羹世間無物為我娛自出金石相轟鏗江邊茆屋風雨晴閉門睡足詩初成叩壺自高歌不顧俗耳驚欲呼君山老父攜諸仙所弄之長笛和我此歌吹月明但愁歛忽波浪起鳥獸駭叫山搖崩天帝聞之怒下遣白鶴迎不容在世作狡獪復結飛佩還瑤京

周青士云磊落

峻峯極其生動

欽定四庫全書



明詩

登陽山絕頂

我登此山巔不知此山高但覺羣山總在下坐撫其頂
同兒曹又見太湖動我前洶涌三十萬頃煙波濤長風
吹人度層嶂不用仙翁赤城杖峰迴秋礙海鶻飛日出
夜聽天雞唱中有一泉長不枯乃是蜿蜒神物之所都
老藤陰森洞府黑樹上不敢留棲鳥常年禱雨車來此
投金符靈旗風轉白日晦馬鬣一滴露三吳巖巒蒼蒼
境多異樵子尋常不曾至探幽歷險未得歸忽聽鐘來

澗西寺此時望青冥脫略塵世情白雲冉冉足下起如
欲載我昇天行古來名賢總何有只有此山長不朽欲
呼明月海上來照把長生一瓢酒浮丘醉枕肱洪崖笑
開口秋風吹落浩歌聲地上行人盡回首

吳中逢王才隨朝京使赴燕南歸

江南草長胡蝶飛白馬新自燕山歸燕山歸不堪說易
水寒風薊門雪朝邸空隨使者車禁闔不受書生謁一
杯勸君歌莫哀歸時應過黃金臺不見荒基秋來土花

紫伯圖已歇昭王死千載無人延國士

戎王追羗圖

前騎脫兔奔後騎驚鴻急火燒秋草獵場空一羗窮追
勢難及大小當戶左右賢衆中得雋知誰先君不見天
策將真天子馳一馬殪四豕

南園

君不見平樂館古城何處寒雲滿君不見奉誠園荒臺
無蹤秋草繁白日沈山水歸海寒暑頻催陵谷改皇天

大運有推移富貴於人豈長在請看當年廣陵王雙旌
六纛何輝光幸逢中國久多故一家割據誇雄強園中
懽遊恐遲暮美人能歌客能賦車馬春風日日來楊花
吹滿城南路疊石為山引泉為池辟疆舊園何足奇經
營三十年欲令子孫永保之不知回首今幾時繁華掃
地無復遺門掩愁鴟嘯風雨種菜老翁來作主空餘怪
石卧池邊欲問興亡不能語春已去人不來一樹兩樹
桃花開射堂踰圃俱青苔何須雍門琴但令對此便可

哀人生不飲何為哉人生不飲何為哉

夜聞謝太史誦李杜詩

前歌蜀道難後歌偏仄行商聲激烈出破屋林鳥夜起
鄰人驚我愁寂寞正欲眠聽此起坐心茫然高歌隔舍
與相和雙淚迸落青燈前李供奉杜拾遺當時流落俱
堪悲嚴公欲殺力士怒白首江海長憂飢二子高才且
如此君今與我將何為

贈金華隱者

我聞名山洞府三十六一一靈蹤紀真錄金華秀出向
東南遠勝陽明與句曲樓臺縹緲開煙霞天帝賜與神
仙家靈源有路不可入但見幾片流出雲中花子房之
師赤松子三千年前亦居此飛行恍惚誰解尋漫說至
今猶不死松花酒熟何處遊瑶草自綠春巖幽羣羊卧
地散如石老鹿耕田馴似牛聞有隱君子乃是學仙者
自從入山中不曾到山下世人莫知其姓名以山呼之
不敢輕樵夫忽見苦未識只疑便是黃初平嗟我胡為

在塵網遠望高峰若天壤茯苓夜煮倘許餐鐵杖來敲
石門響

題黃大癡天池石壁圖

黃大癡滑稽玩世人不知疑似阿母苟再謫偷桃兒平
生好飲復好畫醉後灑墨秋淋漓嘗為弟子李少翁貌
得華山絕頂之天池乃知別有縮地術坐移勝景來書
帷身騎黃鵠去來遠縞素飄落流塵緇潁川公子欣得
之手持示我請賦詩我聞此中可度難玉枕祕記傳自

青牛師池生碧蓮花千葉光陸離服食可騰化遊空駕
雲螭奈何靈蹟久閤藏荒竹滿野啼猩猩尋真羽客不
肯一相顧却借釋子營茅茨我昔來遊早春時雪殘衆
壑銷寒姿磴滑不敢騎馬上青鞵自策桃筇枝上有煙
蘿披拂之翠壁下有沙石蕩漾之清漪晴天倒影落明
鏡正似玉女曉沐高鬟垂飲猿忽下藤裊裊浴鶴乍立
風淅淅匡廬有地我未到未省與此誰當竒掃石坐其
涯沿洄引流卮醉來自照影俯笑知為誰落梅撲香滿

接羅暮出東澗鐘鳴遲歸來城郭中復受塵土欺十年
勝賞難再得恍若清夢一斷無由追朝來觀此圖惻愴
使我悲當時同遊已少在我今未老形先疲人生擾擾
嗟何為不達但為高人嗤漢南已老司馬樹峴首已仆
羊公碑唯應學道悟真訣不與陵谷同遷移仙巖洞府
孰最好東有地肺西峨嵋高厓鐵鎖不可攀援以逕上
仰望白雲樓觀空巍巍此山易上何乃遺便與猿鶴秋
相期欲借太乙舟夜卧浩蕩隨風吹洞簫呼起千古月

照我白髮涼絲絲傾玉醪薦瑤芝招君來遊慎勿辭無
為漫對圖畫日夕遙相思

媯蜚子歌

為友王常宗
作蓋其號也

媯蜚子乃是軒轅之裔虞鯀之孫混沌既死一萬年獨
抱太樸存竊伏在草野冥心究皇墳早逢三光五嶽之
氣乍分裂天狼下地舐血流渾渾鹿走秦中原蛇鬪鄭
國門俎豆棄草莽干戈歟崩奔媯蜚子便欲東游渡弱
水沐髮滄海朝陽盆又欲西行沂河漢踰崑崙山橫川

阻兩地俱不可以往兮歸來掩戶卧旦昏蒔黍一區注
醪一樽妻給井臼兒牧雞豚不詰曲以媚俗不偃蹇而
凌尊作為古文詞言高氣醇溫手提數寸管欲發義理
根上探孔孟心下弔屈賈魂其質耀金石其芳吐蘭蓀
叩虛答有響蹻險成無痕陸珍雜水怪變狀弗可論幾
年兀兀不肯出坐待真主應運九五開乾坤鶴書自天
來幽隱初見拔使者遠造廬雞鳴起膏轄與纂金匱編
尚書為給劄姦魂泣幽冢下恐遭誅殺書成一代進紫

宸鸞旗羽衛夾陛陳閤門導謁稱小臣麻衣不脫拜聖
人捧函近前殿龍顏喜回春勅賚內帑之金與綺段其
文織作銀麒麟蒙恩乞還家以奉白髮親戴古弁垂長
紳自號山澤之臞民媯蚩子幸際明良時無為寂默坐
老東海湄青丘有客鈍且癡與汝欲結同襟期左鼓清
瑟右吹簫作歌共祝天子壽五風十雨萬國赤子同熙
熙

登金陵雨花臺望大江

大江來從萬山中山勢盡與江流東鍾山如龍獨西上
欲破巨浪乘長風江山相雄不相讓形勝爭誇天下壯
秦皇空此瘞黃金佳氣蔥蔥至今王我懷鬱塞何由開
酒酣走上城南臺坐覺蒼茫萬古意遠自荒煙落日之
中來石頭城下濤聲怒武騎千羣誰敢渡黃旗入洛竟
何祥鐵鎖橫江未為固前三國後六朝草生宮闕何蕭
蕭英雄來時務割據幾度戰血流寒潮我今幸逢聖人
起南國禍亂初平事休息從今四海永為家不用長江

限南北

白下送錢判官岳

白門有垂楊復有春酒香此地逢君誰乃是錢少陽相
逢既沽白門酒相送還攀白門柳不向公車更上書却
趨官署初垂綬日落淮水頭送君去悠悠梁王苑裏花
飛盡明日相思過汴州

題滕用衡所藏山水圖

滕君興在煙霞間遠遊十年今始還畫圖示我有層嶂

竟似何處之名山君言我初適東越酒船橫渡鏡湖月
醉詠謫仙天姥吟海光欲曙清猿歇瑶草春已生便入
金華行道逢牧羊兒疑是黃初平從此西遊楚江水大
帆如雲挂空裏柁樓釀酒喚長風一日看山一千里不
聞東林鐘但見香爐峰波迷洞庭闊樹隔瀟湘重白沙
翠壁經過好就中幾度曾幽討麻姑壇上掃落花堯女
祠前薦芳藻晚客湖南逢雁回登臨長上楚王臺天從
朱鳥峰頭轉江自黃牛峽外來蒐奇歷險今應倦默坐

舊遊空數遍時向明窗看此圖好山一一皆重見我聞
君言自歎嗟身如處女愁離家閉門讀書無半車髀肉
漸生空鬢華牀前塵土蔽雙屐何不踏之踐苔石幸逢
盛世道路平五嶽尋真皆可適便當往抱綠綺彈松風
行盡萬壑千巖中仙書探得金匱空歸來誇君重相逢
握手一笑吳門東

過胡博士郊居

胡善
筵

頭白蘭陵客幽居共一村老來吟力退貧去告身存夕

吹鳴梨葉秋泉注稻根時因來問筮獨叩樹間門

送張司勲赴寶慶同知

乍出司勲幕還乘別駕車按圖猶漢地輸布盡蠻家山
熱蛇懸樹江晴鶴浴沙郡樓回首處北斗近京華

贈鄰友

同居一塢中只隔水西東林近書燈露溪迴酒舫通放
鳬長合隊移竹每分叢只恐君徵起難期作兩翁

江上寄王校書行

寥落舊懽違江邊獨掩扉鄰家聞暮笛客舍試春衣宿
鳥歸山亂行人度水稀相思比花絮斜日繞城飛

送謝恭

涼風起江海萬樹盡秋聲搖落豈堪別躊躇空復情帆
過京口渡砧響石頭城為客歸宜早高堂白髮生

晚登南岡望都邑宮闕

落日登高望帝畿龍蟠山下見龍飛雲霄雙闕開黃道
煙樹三宮接翠微沙苑馬閒秋獵罷天街車闕晚朝歸

明朝欲獻昇平頌還逐仙班入瑣闈

送沈左司從汪參政分省陝西

汪由御史
中丞出

重臣分陝去臺端賓從威儀盡漢官
四塞河山歸版籍百年父老見衣冠
函關月落聽雞度華岳雲開立馬看
知爾西行定回首如今江左是長安

清明呈館中諸公

新煙著柳禁垣斜杏酪分香俗共誇
白下有山皆繞郭清明無客不思家
卞侯墓上迷芳草盧女門前映落花

喜得故人同待詔擬沽春酒醉京華

春來

客愁擬向春來減春到愁翻倍舊時走馬已無年少樂
聽鶯空有故園思日光晶晶濃熏草風力颺颺緩墮絲
辟歷溝南酒家路共誰來往問花枝

謁甫里祠

衣冠寂寞半塵絲想見江湖獨卧時遁跡虛煩明主詔
感懷猶賦散人詩釣船魚去雲迷浦鬪鴨闌空草滿池

金瓶梅詞話卷之九
芳藻一杯誰為奠鼓聲只到水神祠

遷城南新居

辛苦中年未有廬東西長寄一囊書未能避俗還依俗
堪信移居更索居葉滿鄰園煙羃羃竹連僧舍雨疎疎
何須許伯長安第此屋翛然已有餘

逢倪徵士

數千里外久相違十八灘頭偶獨歸自說病來辭幕府
只因愁絕念庭闈吳歌重把還鄉酒蠻布猶穿過嶺衣

話盡三年遊歷事滿庭風雨送斜暉

西塢

空山啄木聲敲鏗花落水流縱復橫松風吹壁鶴翎墮
梅雨過溪魚子生尚有人家機杼遠更無塵土衣裳輕
斜陽已沒月未出樵子歸時吾獨行

送錢塘守

繁華莫歎異昇平到郡初煩露冕行幕下吏書催署字
湖中妓舫歇歌聲潮來兩渡皆侵岸日落諸山半入城

休沐南屏煩一到松間尋我舊題名

寄海昌李使君

海上波濤夜不驚使君雖老尚能兵
荒煙白鹵家家竈落日黃岡處處營
人雜島夷爭小市潮隨山雨入孤城
明朝硤石山頭路我欲停車聽頌聲

次韻金文學送弟往海上

小陸賢如大陸賢亂離為客最堪憐
橫金海上知虛席打鼓津頭看發船
麥氣曉晴田雉鬪懷香春暖野鵝眠

明朝夢斷生芳草風雨孤舟過練川

西寺晚歸

遠寺別僧歸隨鐘出煙嶺犬吠竹林間斜陽見人影

陶祕書廣陵送別圖

暮雨潮生瓜步春山樹繞蕪城惆悵離舟欲發江南煙
寺鐘聲

聞舊教坊人歌

渭城歌罷獨淒然不及新聲世共憐今日岐王賓客盡

江南誰識李龜年

秋柳

欲挽長條已不堪
都門無復舊毵毵
此時愁殺桓司馬
暮雨秋風滿漢南

秋夜同周著作宿婁浦

小解寒依竹浦雲
酒闌相對說離羣
一聲新雁誰先聽
今夜江南我共君

春思

愁兼楊柳一絲絲
客舍江南暮雨時
自入春來才思減
杏花開過不題詩

入郭過南湖望報恩浮圖

雨過春陂柳浪香
布帆歸緩怕斜陽
漁人為指江城近
一壩船頭看漸長

山中春曉聽鳥聲

子規啼罷百舌鳴
東窗卧聽無數聲
山空人靜響更切
月落杏花天未明

逢吳秀才復送歸江上

江上停舟問客蹤
亂前相別亂餘逢
暫時握手還分手
暮雨南陵水寺鐘

吳宮

芙蓉水殿牒廊東
白苧秋來不耐風
教得君王長夜醉
月明歌舞在舟中

詩話季迪楚宮詞云細腰無限空相妒不覺瑤
姬夢裏逢秦宮詞云掖庭無用恩難報願上蓬
萊采藥船魏宮詞云至尊莫信陳王賦那得人
間有洛神思非不深第傷於巧不若吳宮之近

雅也

雨中登天界西閣

青山樓閣楚江東自在蒼茫晚色中
故國自遙難望見不關春樹雨溟濛

送葛省郎東歸

金陵女兒踏春陽金陵客子正思鄉
一杯況復送君去目斷飛花江水長

宿蟾公房

一禽不鳴深樹煙
月下照高僧
禪獨開西閣
詠清夜
秋河欲墮山蒼然

雨中過山

春雲晻靄澗奔渾
風雨行人過一村
不似山家深竹裏
乳鳩啼午未開門

吳王井


曾聞鑑影照宮娃
玉手牽絲帶露華
今日空山僧自汲
一瓶寒供佛前花

消夏灣

涼生白苧水浮空湖上曾開避暑宮
清簟疎簾人去後
漁舟占盡柳陰風



明詩綜卷九



總校官庶吉士臣張能照

校對官編修臣閔鴻大

謄錄監生臣楊仁基